

کِتابِ مُکاشفه

پیشگفتار

کِتابِ مُکاشفه زمانی نوشتہ شد که ایماندارای عیسیٰ مسیح ازی که عیسیٰ مسیح ره مَولاً مُوگفت، آزار-و-آذیت مُوشد. مقصدِ اصلی یوحنّا ای آسته که ایماندارا ره تشویق کنه و بَلَدِه ازوا اُمید بِدیه تا اُونا دَ وخت سختی و مشکلات دَ ایمان خُو مُستَحکم و وفادار بُمنه.

کَلونی امزی کِتاب رویا های آسته که بطور تشبیه و سرپوشیده بیان شده و ایمانداری امزُو زمان او ره خوب پی مُورده، ولے بَلَدِه دِیگرو پُر از رَمَز-و-راز آسته.

دَ امزی کِتاب یوحنّا از طرفِ خُدا یگ رویا مینگره و دَ امزُو رویا دَز شی هدایت دَده مُوشہ که بَلَدِه هفت جماعتِ ایماندارِ ولایتِ آصیا خط نوشتہ کنه و اُونا ره ام تشویق کنه و ام اخطار بِدیه. باقی رویای یوحنّا دَ باره جنگِ لشکر های خُدا و لشکر های ابليس آسته که دَ امزُو جنگِ ابليس شکست مُخوره و آسمو و زمین نَو دَ وجود مییه که دَ وسیله شکوه-و-جلالِ خُدا روشو-و-درخشان آسته.

فهرستِ عنوانها

مُقدمه (فصل ۱ آپه ۱)

شروع پیشگویی (۴:۱)

رویای یوحنا (۹:۱)

خط‌ها بَلِدِه هفت جماعتِ ایماندار (۲:۱ تا ۳:۲۲)

تَختی که دَ عالِم باله یه (۱:۱۴)

طومار و باره (۱:۵)

کندون مُهر‌ها (۱:۶)

یگ صد و چُل و چار هزار (۱:۷)

گروه کَله قد کالاهای سفید (۹:۷)

مُهر هفتم (۱:۸)

هفت شیپور (۶:۸)

ملایکه و طومار ریزگَگ (۱:۱۰)

دُو شاهِدِ خُدا (۱:۱۱)

شیپور هفتم (۱۱:۱۵)

خاتو و آزادار (۱:۱۲)

جانورِ وحشی دریا (۱:۱۳)

جانورِ وحشی دوّم (۱۳:۱۱)

باره دَ بَلِه کوهِ صَهیون (۱:۱۴)

سِه ملایکه (۱۴:۶)

شروع کارِ دروگرا (۱۴:۱۴)

هفت ملایکه و هفت بَلَّا (۱۵:۱)

هفت پیله غَضَبِ خُدا (۱۶:۱)

فاحشِه کَلَّه (۱۷:۱)

سُقُوطِ شارِ بَابُل (۱۸:۱)

خوشی دَ عَالَمِ باله (۱۹:۱)

هزار سال (۲۰:۱)

محْكُوم شُدُونِ شَيْطَو (۲۰:۷)

قضاياً مُرْدَهَا (۲۰:۱۱)

اورُشَلَيمِ نَو (۲۱:۱)

دریای آبِ حَيَات (۲۲:۱)

مُقدَّمه

۱ ای مُکاشفِه عیسیٰ مسیح آسته که خُدا بَلَّه شی دَد تا چیزای ره که دَ زُودی باید واقع شنے، بَلَّه خدمتگارای خُو نِشو بِدیه. او ملایکه خُو ره رَبی کد تا امُو چیزا ره بَلَّه خدمتگار خُو یوحنًا بَرَمَلا کُنه. ۲ و یوحنًا دَ بارِه تمام چیزای که دید شاهِدی مِیدیه، یعنی د بارِه کلامِ خُدا و شاهِدی عیسیٰ مسیح. ۳ نیک دَ بَخَتِ کسی که کلمه های امزی پیشگویی

ره میخانه و نیک دَ بَختِ کسای که گوش میگیره و چیزای ره که دمزي پیشگویی نوشتنه
یه نِگاه مُونه، چراکه وخت نزدیک أسته.

شروع پیشگویی

از طرفِ یوحنا^۳، بَلِدِه هفت جماعتِ ایماندارا که دَ ولایتِ آسیا أسته: فَیض و سلامتی از طرفِ امزُو که أسته، بُود و مبیه نصیب شُمو شُنَه و از طرفِ هفت روح که دَ پیشِ رُوى تَخت شی أسته،^۴ و از طرفِ عیسیٰ مسیح که شاهدِ راستگوی أسته و اوّلین کسی که از مینکلِ مُرده ها زِنده شُده و حکمرانِ پادشايونِ زمی يه.

امُو که مو ره مُحبَّت مُونه و مو ره از گُناهای مو قد خُون خُوازد کد^۵ و مو ره دَ پادشاهی رسند تا دَ عنوانِ پیشوا بَلِدِه خُدا يعني آته شی خدمت کنی؛ جلال و قدرت تا أبداللاباد ازو باد! آمین.

اونه، او قد آور ها مبیه^۶

و هر چیم او ره مینگره،

حتیٰ کسای که او ره قد نیزه زَده؛

و تمامِ قوم های رُوی زمی بخاطرِ ازو ماتم مُونه. آرے، امی رقم مُوشہ! آمین.

خُداوند-خُدا مُوگیه: "ما «آلِف» و «یا» آستُم، امُو که آسته، بُود و مییه، امُو قادرِ^۹ مُطلق".

رویای یوحنا

ما یوحنا، بِرار شُمو آستُم که د آزار-و-آذیت و د پادشاهی و د صبر-و-حوصله د وسیله عیسی مسیح قد شُمو شریک آستُم. ما بخاطرِ کلامِ خُدا و شاهدی د باره عیسی مسیح د یگ جزیره د نامِ پاتموس بُودم^{۱۰} که د روزِ مولا د زیر تاثیرِ روح قرار گرفتم و از پُشت خُو یگ آوازِ بلند رقم آوازِ شیپور شنیدم^{۱۱} که گفت: "چیزی ره که مینگری د یگ کتاب نویشه کُو و د هفت جماعتِ ایماندارا رَی کُو، یعنی د افسُس، اسمیرنا، پِرگاموس، تیاتیرا، سارِدِس، فیلادِلفیه و لائودِیکیه."

اوخته رُوی خُو ره دور دُدم تا صاحبِ امزُو آواز ره که قد ازمه توره مُوگفت بِنگرم؛ و غیتیکه رُوی خُو ره دور دُدم هفت چراغدانِ طلایی ره دیدم^{۱۲} و د مینکلِ چراغدانان یگو کس رقم «باچه انسان» الی بُود که چَنِ دراز پوشیدد و شالِ زَرین د بَلِه سینه شی بُود. سر و مُوی شی رقم پاشم الی سفید بُود، سفید مثلِ بَرف؛ و چیمای شی رقم آنگه آتش، پای های شی رقم بِرنج جلا دَدگی که د کوره آتش جلا دَده شده بشه و آواز شی

رقمِ غُرِشِ آو های کَلو. ^{۱۶} او دِستِ راست خُو هفت سِتاره دَشت و از دان شی شمشیر تیزِ دُو دَم بُر مُوشد و چهِره شی رقمِ آفتو الی بُود که روشنی بَقوَت مِیدَد.

وختیکه او ره دِبِدُم رقمِ مُرده الی دَپیشِ پای های شی اُفتَدُم، لیکن او دِستِ راست خُو ره دَبَلِه مه ایشته گفت: "ترس نَخور، ما اوّل و آخر آسْتُم" ^{۱۸} و امُو که زِنده يَه. ما مُرده بُودُم، ولے توخ کُو، الی تا آبَدالْأباد زِنده آسْتُم و کِلی های مَرگ و عالمِ مُرده ها دَپیشِ از مه يَه. ^{۱۹} پس چیزای ره که دِیدی و چیزای ره که آسته و چیزای ره که بعد ازی واقع مُوشه نوِشته کُو. ^{۲۰} رازِ امزُو هفت سِتاره که دِستِ راست مه دِیدی و رازِ امزُو هفت چراغدانِ طِلَّایی اینی آسته: امُو هفت سِتاره ملایکه های هفت جماعتِ ایماندار آسته و امُو هفت چراغدان امُو هفت جماعتِ ایماندار.

بَلِدِه جماعتِ ایماندارای شارِ افسُس

۲ ^۱ بَلِدِه ملایکه جماعتِ ایماندارای افسُس نوِشته کُو:

امُو کسی که هفت سِتاره دِستِ راست خُو دَرَه و دَمینکلِ هفت چراغدانِ طِلَّایی قَدم میزَنه اینی تورا ره مُوگیه: ^۲ ما از اعمال تُو، از زَحمت و صَبر-و-حَوصلِه تُو باخبر آسْتُم. ما مِیدَنُم که تُو مردمای شریر ره تَحَمُل نَمِيتَنی؛ تُو امُو کسای ره که خود ره رسُول مُوگیه،

ولے نیسته آزمایش کدی و پی بُردى که اونا دروغگوی استه.^۳ تُو صَبَرْ-و-حَوْصِلَه کدی و بخاطرِ نامِ ازمه سختی ها ره تَحَمُّل کدی و مَنَدَه-و-دِلْسَرَد نَشْدَی.

لیکِن امی یگ شِکایت ره دَضِدْ تُو دَرْم: تُو عِشَقْ-و-عَلَاقَه اوْلَى خُوره ایله کدے.^۴ پس دَیاد خُوبِرُو که از کُجا افتَدَی! توبه کُو و امُو اعمال ره انجام بِدی که دَاوَل انجام مِیدَدی. اگه توبه نَكْنَی، ما دَپیش تُو مِيْيُم و چِراگدان تُوره از جای شی باله مُونُم.

لیکِن امی یگ خُوبی ره دَری که از کارای نِیکولائیان بَد مُوبِری، امُو رقم که ما ام بَد مُوبِرُم.^۵ هر کسی که گوشِ شِنَوا دَرَه، گوشِ بِگِیره که روح بَلَدِه جماعت های ایماندارا چیز خیل مُوگیه. هر کسی که پیروز شُنه، ما بَلَدِه اُزو حق مِیدِیم که از دِرَختِ حیات که دَباغِ بِهِشتِ خُدا آسته، بُخوره.

بَلَدِه جماعتِ ایماندارای شارِ إسمیرنا

بَلَدِه ملایکِه جماعتِ ایماندارای إسمیرنا نوشتہ کُو:

امُو کسی که اوْل و آخر آسته، امُو که مُرد و دُوباره زِنده شُد، اینی تورا ره مُوگیه:^۶ ما از مُصِبَّت و غَرِيبَی تُو خبر دَرْم، با وجودِ که دَولَتَمَند آستی! ما از بَدَگُویی امْزُو کسا خبر دَرْم که خود ره یهُودی مُوگیه، ولے یهُودی نِییه، بَلَکِه جماعتِ شَيْطَو آسته.^۷ از رَنَج-و-عذابی که دَبِلَه تُو امَدَنی آسته، ترس نَخور. باخبر بش که ابِلِیس بعضی از شُمُو ره دَ

بَنْدِی خانه مِینَدَزه تا آزمایش شُنِید و بَلَدِه دَه روز شُمُو رَنْج-و-عذاب مِینَگرید. لیکن تا دَمِ
مَرَگ و فادار بَش و ما تاج حَيَاٰت ره دَز تُو مِيدِيُم.^{۱۱} هر کسی که گوشِ شِنَوا دَرَه، گوش
بِكِيره که روح بَلَدِه جماعت های ايماندارا چيزخيل مُوگيَه. هر کسی که پيروز شُنه، از
مرگِ دَوم هِيچ ضَرَر نَمِينَگره.

بَلَدِه جماعتِ ايمانداراي شار پِرگاموس

^{۱۲} بَلَدِه ملايِيكه جماعتِ ايمانداراي پِرگاموس نوِشته کُوه:

امُو کسی که شمشيرِ تيَزِ دُو دَم دَرَه، اينى تورا ره مُوگيَه:^{۱۳} ما مِيدَنُم که تُو دَكُجا
زِندَگى مُونى، دَ جَاي که تَختِ شَيَطُو آستَه. ولَى با وجودِ ازى ام تُو دَنَام ازمه قايم-و-
أَسْتَوَارْ مَنْدَه و ايمانى ره که دَز مه دَرَى إِنْكَارَ نَكَارَه، حتَّى دَامْزُو روزَيِ که أَنْتِيپَاس
شاھِيدِ وفادار مه دَمِينَكَل شُمُو، دَ جَايِي که شَيَطُو بُود-و-باش دَرَه کُشَتَه شُدَّ.

^{۱۴} مَكَمْ چند چِيز دَضِيد تُو دَرُم: تُو دَأُونجَى كَسَاي ره دَرَى که از تعليِيمِ بِلَعَام نَبَى پَيَروِي
مُونَه، از تعليِيمِ کسی که بالاق پادشاه ره ياد دَد که دَمِ روی بَنَى إِسْرَائِيل سنگِ
لَخَشَنْدُك بيله تا اُونا از خوراك های که بَلَدِه بُت ها قُربانى شُدَه بُخُورَه و دَ زِناَكَارِي
گِرفتار شُنَه.^{۱۵} امي رقم تُو بعضى کسَاي ره ام دَرَى که از تعليِيمِ نِيكولائيان پَيَروِي مُونَه.
پس توبه کُوه! اگه نَه، دَزُودِي دَپِيش تُو مِيَمُون و قد شمشيرِ دان خُو دَ خِلَافِ ازوا جنگ

مُونُمٌ.^{۱۷} هر کسی که گوشِ شِنوا دَرَه، گوش بِگیره که روح بَلَدِه جماعت‌های ایماندارا چیز خیل مُوگیه: هر کسی که پیروز شُنَه، ما از «مَن» تاشه شُدَه بَلَدِه شی مِیدِیم و ام یگ سنگِ سفید بَلَدِه اُزْو مِیدِیم که دَرُوی امْزو سنگ یگ نامِ نَو نوشتَه يَه که هیچ کس او ره نَمُوفَامه بَغَیر از کسی که او ره دِست میره.

بَلَدِه جماعتِ ایماندارای شار تیاتیرا

بَلَدِه ملایکه جماعتِ ایماندارای تیاتیرا نوشتَه کُو:

باچه خُدا که چیمای شی رقمِ الَّنگِه آتش الّی و پایای شی رقمِ برِنجِ جَلَا دَدگی اَستَه اینی توره‌ها ره مُوگیه:^{۱۹} ما از اعمال تُو، از مُحَبَّت، ایمان، خِدمَت و صَبَر-و-حَوْصِلَه تُو خبر دَرُم و مِیدَنُم که کارای آخر تُو از اوّل کده خُوبیَّت اَستَه.

لیکن امی یگ شِکایت ره دَضِد تُو دَرُم: تُو امُو خاتُو ره که ایزاپل نام دَرَه سر ایله ایشته، امُو ره که خود ره پیغمبر مُوگیه و قد تعلیم خُو خِدمتگارای مَرَه گُمراه مُونه، تا زِناکاری کُنه و از خوراک‌های که بَلَدِه بُت ها قُربانی شُدَه، بُخوره.^{۲۱} ما بَلَدِه شی وخت دَدُم که از زِناکاری خُو توبه کُنه، لیکن او نَمیخایه که توبه کُنه.^{۲۲} اینه، ما او ره مِیزَنُم که دَجاگه بُفتَه و کسای ره که قد اُزْو زِنا مُونه دَرَنَج-و-مُصِبَّت سخت گِرفتار مُونُم، سِوای که اُونا از کارای خُو توبه کُنه;^{۲۳} و ما پَیَروای اُزْو ره مِیزَنُم که بُمُره. اوخته تمام جماعت

های ایماندارا میدانه که ما امُو آستُم که دل‌ها و فِکرا ره کُنج-و-کاو مُونُم و هر کُدم شُمو
ره د مُطابِقِ اعمال شُمو آجر یا جَزا میدیم.^{۲۴}

لیکن بَلَدِه باقی شُمو که د تیاتیرا آستَید، شُمو کسای که ای تعليِم ره قبُول نَکدِید و
چیزی ره که «رازِ غُوج شیطو» گفته مُوشه یاد نَگرفتید، دَز شُمو مُوگم که ما کُدم بار
دیگه ره دَبَلِه شُمو نَمیلُم،^{۲۵} فقط د چیزی که دَرید محکم بشَید، تا وختِیکه ما بییم.
کسی که پیروز شُنه و کارای مَره تا آخر د جای بیره، او ره دَبَلِه مِلت ها قُدرت-و-^{۲۶}
اختیار میدیم:^{۲۷} او قد سوِّیه آینی دَبَلِه ازوا حُکمرانی مُونه و اونا ره رقم کُوزِه گلی میده
میده مُوکنه، امُو رقم که ما قُدرت-و-اختیار ره از آته آسمانی یافتم.^{۲۸} امچنان بَلَدِه ازو
ستاره صُبح ره مُوبخشم.^{۲۹} هر کسی که گوشِ شِنوا دَرَه، گوش بِگیره که روح بَلَدِه
جماعت های ایماندارا چیزخیل مُوگیه.

بَلَدِه جماعتِ ایماندارای شارِ سارِدِس

^{۳۰} بَلَدِه ملایکه جماعتِ ایماندارای سارِدِس نوشته کُو:

امُو کسی که هفت روحِ خُدا و هفت ستاره دَرَه اینی توره ها ره مُوگیه: 'ما از کارای تو
باخبر آستُم؛ تو نام بُر کدے که زِنده آستی، ولے مُرده بی. بیدار شُو و چیزای ره که باقی

مَنْدَه و نَزِدِيْكَ دَمْرُدوْيَه، قُوَّتِ بِدِيْ، چِراکَه ما اعْمَال تُو رَه دَحْضُورِ خُدَا كَامِل نِيَاْفَتُمْ.

^٣ پس چِبِزِي رَه كَه حاصلِ كَدِي و شِينِيدِي دَيادِ خُو بَيْرُو و أُو رَه دَجَای أُورَدَه توْبَه كُو.

ليِكِنْ اَگَه بِيدَار نَشْنَى، ما رَقْم دُزَ الَّى دَبَلِه تُو مِيْيُم و تُو نَمُوفَامِي كَه دَكُدَم زَمَان دَبَلِه تُو

^٤ ليِكِنْ هَنْزَ چَند نَفَر دَسَارِدِس دَرِي كَه دَامُون خُو رَه نَأپَاك نَكَدَه و أُونَا دَكَالَى مِيْيُم.

سفِيدَ قَد اَزْمَه قَدَم مِيزَنَه، چِراکَه لَايِق شَى رَه دَرَه. ^٥ هَر كَسِي كَه پِيرَوَز شُنَه رَقْم اَزوَا

كَالَى سَفِيدَ دَجَان شَى دَدَه مُوشَه و نَامِ اَزُو رَه هَرَگِز اَز كِتابِ حَيَاة گُل نَمُونَم، بَلَكِه نَامِ

اَزُو رَه دَحْضُور آَتِه خُو و مَلَيِكَه هَاي شَى اِقرَار مُوكَمْ. ^٦ هَر كَسِي كَه گَوشِ شِنَوَا دَرَه،

گَوشِ بِكِيرَه كَه رَوْح بَلَدِه جَمَاعَتِ هَاي اِيمَانِدارَا چِيزِخِيل مُوكَيَه.

بَلَدِه جَمَاعَتِ اِيمَانِدارَاي شَارِ فِيلَادِلفِيه

^٧ بَلَدِه مَلَيِكَه جَمَاعَتِ اِيمَانِدارَاي فِيلَادِلفِيه نُوشَتَه كُو:

اَمُو كَسِي كَه مُقَدَّس و حَقَ أَسْتَه، اَمُو كَسِي كَه كِلَى دَأْوُود رَه دَرَه، اَمُو كَه واَز مُونَه و هَيْچ

كَس بَسْتَه كَدَه نَمِيتَنَه، اَمُو كَه بَسْتَه مُونَه و هَيْچ كَس واَز كَدَه نَمِيتَنَه، اَينَى تُورَه هَا رَه

مُوكَيَه: ^٨ ما اَز اَعْمَال تُو باَخْبَر أَسْتَمْ. اَينَه، ما يِكَ درَگَه واَز رَه دَپِيشِ رُوَى تُو اِيشْتَيِم كَه

هَيْچ كَس او رَه بَسْتَه كَدَه نَمِيتَنَه؛ ما مِيدَنَم كَه قُوَّت تُو كَم أَسْتَه، ولَسَ تُو كَلام مَرَه نِگَاه

كَدِي و نَام مَرَه انْكَار نَكَدِي. ^٩ اَينَه، اَمُو كَسَاي كَه اَز جَمَاعَتِ شَيْطَو أَسْتَه و خَود رَه

يَهُودِي مُوكَيَه ولَسَ نِيَيَه و دَرُوغ مُوكَيَه، ما أُونَا رَه وَادَار مُونَم كَه بِيَيَه و دَپِيشِ پَايَاي تُو

بُفته و بِدَنه که ما تُو ره دوست دَرُم.^{۱۰} ازی که تُو کلام مَره قد صَبر-و-حَوصله نِگاه کدی،
ما ام تُو ره از ساعتِ آزمایش نِگاه مُونم که دَبَله تمامِ دُنیا آمدَنی آسته تا تمامِ کسای که
دَرُوی زمی زِندگی مُونه آزمایش شُنَه.^{۱۱} ما دَزُودی مییم؛ پس دَچیزی که دَری محکم
بَش، تا هیچ کس تاج تُو ره گِرفته نَتَنَه.^{۱۲} هر کسی که پیروز شُنَه، او ره دَخانِه خُدای خُو
یگ ستُون جور مُونم و او هرگز ازْونجی بُرو نَموره. ما دَبَله اُزو نامِ خُدای خُو ره نوِشته
مُونم و نامِ شارِ خُدای خُو ره یعنی نامِ اورُشَلیم نَو ره که از عالم باله از طرفِ خُدای مه
مییه و امچُنان نامِ نَو خود ره.^{۱۳} هر کسی که گوشِ شِنَوا دَرَه، گوشِ بِگیره که روح بَلَده
جماعت های ایماندارا چیزخیل مُوگیه.

بَلَده جماعتِ ایماندارای شارِ لائو دِیکیه

^{۱۴} بَلَده ملا یکِه جماعتِ ایماندارای لائو دِیکیه نوِشته کُو:

امو که «آمین» گُفته مُوشَه، امو شاهِد صادِق و راستگوی که سرمنشِه خِلقتِ خُدا آسته،
اینی توره ها ره مُوگیه:^{۱۵} ما از اعمال تُو خبر دَرُم؛ تُو نَه سَرد آستَى و نَه گرم. کشکِه يا
گرم مُوبُودی يا سَرد.^{۱۶} پس، بخاطری که تُو دِلمَل آستَى، یعنی نَه گرم و نَه سَرد، تُو ره از
دان خُوتُف مُونم.^{۱۷} چون تُو مُوگی: "ما دَولتمَند آستُم و مال-و-دولت جم کدیم و دَهیچ
چیز مُحتاج نِیسَتُم." مگم تُو خبر نَدری که بیچاره، مُسکِین، غَرِیب، کور و لُچ آستَى.
ما تُو ره نصِیحت مُونم که طِلَّای دَآیش خالص شُدَه ره از مه بِخَر تا دَولتمَند شُنَی؛ و^{۱۸}

کالای سفید ره بِخْر تا بُپوشی و شرمندگی لُچی خُو ره بُپوشَنی، و مَلَم ره بِخْر تا دَچِیمای خُو ملِیده بِینا شُنی.^{۱۹} کسای ره که ما دوست دَرُم، اُونا ره سرَزَنِش و إصلاح مُونُم؛ پس سرِ غَیرَت شُو و توبه کُو.^{۲۰} اینه، ما دَدانِ درگه ایسته شُدَه ٿَخ ٿَخ مُونُم؛ اگه کس آواز مَرَه بِشنَوَه و درگه ره واز کُنه، ما دَپیشِ اُزو داخل موْرُم و قد اُزو نان مُوخورُم و اُوام قد ازمِه نان مُوخوره.^{*}

هر کسی که پیروز شُنَه، ما اِی حق ره دَزُو مِیدِیم که قد ازمِه قتی دَبَلَه تَخت مه بِشِینه، اُمو رقم که ما پیروز شُدُم و قد آته خُوقتی دَبَلَه تَخت اُزو شِشَتُم.^{۲۱} هر کسی که گوشِ شِنَوَا دَره، گوش بِگِیره که روح بَلَدِه جماعت های ایماندارا چِیز خیل مُوگیه.^{۲۲}

تَختی که دَ عَالَم باله يَه

۱۳ بعد اُزو چِیزا ما توخ کُدم و دِیدُم که یگ درگه دَ عَالَم باله واز آسته و اُمو آواز ره که دَ اوّل شِنِیده بُودُم که رقمِ آوازِ شِپُور قد ازمِه گپ مِیزَد، بسم گفت: "دَ اینجی باله بیه و ما چِیزا ره بَلَدِه تُو نِشو مِیدِیم که بعد ازی باید واقع شُنَه."^{۲۴} بے بلغه دَ زیرِ تاثیرِ روح قرار گِرفتم و دِیدُم که دَ عَالَم باله یگ تَخت آسته و دَبَلَه امْزُو تَخت یَگو کس شِشَتَه.^{۲۵} اُمو که دَ اونجی شِشَتُد رقمِ سنگِ یَشم و عَقِيق نُورانی معلوم مُوشُد و دَ گِردَاگِرد تَخت یگ رنگِین کمان بُود که رقمِ زَمَرُد الَّى دَ نظر مُوخورَد.^{۲۶} دَ گِردَاگِرد تَخت، بِیست و چار

تَخْتِ دِيگه بُود و دَبَلِه امْزُو تَخْت ها بِيِسْت و چار بُزُرگ شِشْتُد که كالاي سفید دَ جان خُدَشت و دَ سِرِ هر كُدَم ازوا تاج طِلَابِي بُود.^۵ امْزُو تَخْت آتِشَك ها و غُرِيشِ ها و گُرگُدراغ ها بُر مُوشُد. دَ پِيشِ رُوي تَخْت هفت چِراغ مُوسوخت که هفت روح خُدا أَسْتَه.^۶ امْچُنان دَ پِيشِ رُوي تَخْت يِگ چِيز رقمِ دريای شِيشَه معلُوم مُوشُد، رقمِ بِلَور. دَ مِينِكلِ تَخْت و دَ گِرداگِردِ تَخْت چار مَوْجُود زِنَدَه بُود که پُشت و پِيشِ ازوا پُر از چِيم بُود.^۷ مَوْجُود زِنَدَه اول رقمِ شير بُود، دَوْمِي شِي رقمِ گوسله بُود، سِوْمِي شِي چِهره رقمِ إنسان دَشت و چارُمِي شِي رقمِ بُرگِيج پَرواَز کده بُود.^۸ امُو چار مَوْجُود زِنَدَه هر كُدَم شِي شَش بال دَشت و گِرداگِرد و طرفِ داخِلِ بال ها پُر از چِيم بُود. اونا شاو و روز بِدُونِ دَمِراسِي مُوكَفَت:

“قدُوس، قدُوس، قدُوس،

خُداوند-خُدَى قادِرِ مُطَلق

”که بُود و أَسْتَه و مِيِيه.

هر غَيْتِيکه امُو مَوْجُوداتِ زِنَدَه امُو ره که دَبَلِه تَخْت شِشْتُد و تا آبَد زِنَدَه يَه، بُزُرگَي-و-^۹ جلال دَده احِترام و شُكْر-و-سِپاسِ مُوكَد،^{۱۰} امُو بِيِسْت و چار بُزُرگ دَ حُضُورِ امْزُو که دَ تَخْت شِشْتُد و تا آبَد زِنَدَه يَه موْفَتَد و أُو ره پِرسِتِشِ مُوكَد؛ اونا تاج هاي خُو ره دَ پِيشِ رُوي تَخْت پورته کده مُوكَفَت:

۱۱ "آی خُداوند-خُدای مو، تُو لایق شی ره دَری

که جلال و حُرمَت و قُدرت پَیدا کُنی،

چُون تُو تمام چِیزا ره خَلق کدی

و دَ خاست-و-اِرادِه ازْتُو اُونا دَ وجود آمده و آسته. "

طومار و باره

۵ اوخته دِدستِ راستِ امزُو که دَ بَلِه تَخت شِشْتُد، يگ طومار ره دِیدُم که دَ پُشت و رُوی خو نوِشته دَشت و قد هفت مُهر، مُهر-و-لاک شُدد.^۲ و يگ ملايکه قُدرتمند ره دِیدُم که قد آوازِ بلند اعلان مُوكد که، "کِی لایق شی ره دَرَه که مُهراي طومار ره کنده او ره واز کنه؟"^۳ ولے هیچ کس دَ اسمو و يا دَ رُوي زمی يا دَ زیرِ زمی نَتِنیست که امُو طومار ره واز کُنه و مَنه شی ره بِنگره.^۴ و ما زار زار چخرا مُوكدُم، چُون هیچ کس پَیدا نَشُد که لایقِ واز کدونِ امزُو طومار مُوبُود و مَنه شی ره مِیدِید.^۵ اوخته يکی امزُو بُزرگا دَز مه گفت: "چخرا نَکُو! اونه، شیرِ طایفِه یهُودا که از رِیشه داُود آسته، پیروز شُدَه تا هفت مُهرِ طومار ره بِکَنه و او ره واز کُنه."

بعد اُزو دِيدم که دَ بَيْنِ تَخت و چار مَوْجُودِ زِنده و دَ مِينَكِلِ بُزْرَگا يِگ باره اِيسته بُود که رقمِ باره حلال شُدَه بُود. او هفت شاخ و هفت چِيم دَشت که هفت روح خُدا آسته و دَ تمام زمی رَيَّي شُدَه. ^۹ او آمد و طومار ره از دِسْتِ راستِ امزُو که دَ بَلِه تَخت شِشْتُد، گِرفت. وختِيکه طومار ره گِرفت، امُو چار مَوْجُودِ زِنده و امُو بِيِسْت و چار بُزْرَگ، دَ پِيشِ باره رُوي دَ خاك اُفتَد. هر كَدِم ازوا يِگ بَرِيط دَشت و جامَك هاي طِلَابِي پُر از بُخور خوشبوی که دُعا هاي مُقدَّسيَن آسته. ^۹ اونا يِگ سُرُود نَو ميَخاند:

”تو لايق شى ره دَرى که طومار ره بِكِيرى

و مُهراي شى ره واز کنى،

چراكه تو حلال شُدَى

و قد خُون خُو مردم ره از هر طايفه و زِيو و قَوم و مِلَّت بَلِده خُدا خريدي

^{۱۰} و ازوا بَلِده خُدائى مو پادشايو و پيشوايو جور کدى

و اونا دَ بَلِه زمی پادشاهی مُونه.“

^{۱۱} بعد اُزو ما توخ كَدِم و آواز ملايكه هاي کَلو ره شِينِيدم که گِرداگِرد تَخت و مَوْجُوداتِ

زِنده و بُزُرگا ره گِرفتند و تعدادِ ازوا لَک ها و هزاران هزار بُود. ^{۱۲} اونا قد آوازِ بلند

مُوگفت:

”باره که حلال شد لایق شی ره دره“

که قُدرت و دَولت، حِکمت و قوّت،

حُرمت و جلال دشته بشه و سِتایش شنه.“

^{۱۳} اوخته شِنیدم که تمامِ مخلوقاتی که د آسمو، د رُوى زمی، د زیر زمی و د دریا أسته و
چیزای که د مَنه ازوا وجود دره، مُوگفت:

”سِتایش و حُرمت، جلال و قُدرت“

امزو بشه که د بَلَه تَخت شِشته و از باره تا أَبَد الْأَبَاد!“

^{۱۴} و امُو چار مَوْجُودِ زِنده گفت: ”آمين!“ و امُو بُزُرگا رُوى د خاک اُفتَدَه او ره سَجَدَه کد.

^۱ اوخته دیدم که باره یکی امزو هفت مُهر ره واز مُونه و شنیدم که یکی امزو چار مَجْوُودِ زِنَدَه قد آواز رقمِ گُرگُر دراغ الی مُوگیه: "بیه!" ^۲ و دیدم که اوته، یگ آس سفید مییه و کسی که دَبَلِه شی سوار بُود، یگ کمون دشت. بَلِدَه ازو یگ تاج دده شد و او پیروزمندانه پیش رفت تا پیروز شنه.

^۳ وختیکه او مُهر دوم ره واز کد، شنیدم که مَجْوُودِ زِنَدَه دوم مُوگیه: "بیه!" ^۴ اوخته یگ آس دیگه که رنگِ آتشی دشت بُرو آمد و بَلِدَه کسی که دَبَلِه شی سوار بُود، قدرت دده شد تا صلح ره از زمی باله کنه تاکه مردم یگدیگه خو ره بُکشه. بَلِدَه ازو یگ شمشیر کله ام دده شد.

^۵ غیتیکه او مُهر سوم ره واز کد، شنیدم که مَجْوُودِ زِنَدَه سوم مُوگیه: "بیه!" و دیدم که اوته، یگ آس سیاه مییه و کسی که دَبَلِه شی سوار بُود، دِست خو یگ ترازو دشت. ^۶ از مینکل امزو چار مَجْوُودِ زِنَدَه، یگ آواز ره شنیدم که مُوگفت: "یگ منک گندم مُزد" یگ روز کار و سه منک جو مُزد یگ روز کار و د روغۇ و شراب ضرر نَرسَن.

^۷ وختیکه او مُهر چارم ره واز کد، آواز مَجْوُودِ زِنَدَه چارم ره شنیدم که مُوگیه: "بیه!" و دیدم که اوته، یگ آس کبود مییه و کسی که دَبَلِه شی سوار بُود «مرگ» نام دشت و

عالِمِ مُرده ها از پُشتِ اُزو می‌مَد. بَلِدِه ازوا قُدرت دَدَه شُد تا مردمِ یگ چارُمِ زمی ره د وسیله شمشیر، قحطی، مَرضِ وُبا و جانورای درِنِدِه رُوی زمی بُکْشه.

٩ وختِیکه او مُهرِ پنجم ره واز کد، دَزیرِ قُربانگاه جان های کسای ره دیدم که بخاطرِ کلامِ خُدا و بخاطرِ محکم بُودو د شاهیدی که قبُول کُدد، کُشته شُدد. ١٠ اونا قد آوازِ بلند چیغ زَده مُوگفت: "آی خُداوند قادرِ مطلق، قُدوس و بَرحق، تا کی قضاوت نَمونی و إنتقامِ خُون مو ره از باشنده های رُوی زمی نَمیگیری؟" ١١ اوخته بَلِدِه هر کُدم ازوا یگ کالای سفید دَدَه شُد و دَزوا گُفته شُد که کِمِ دیگه ام آرام کنه تا تعدادِ همکارا و بِرارونِ ازوا که رقمِ ازوا کُشته مُوشه، پُوره شُنه.

١٢ و دیدم که او مُهرِ ششم ره واز کد و یگ زلزله قَوی رُخ دَد و آفتَو رقمِ پلاسِ درشت سیاه شُد و ماہ کامِلاً رقمِ خُون الی سُرخ شُد ١٣ و سِتاره های آسمو د زمی ریخت، رقمی که درختِ انجیر از بادِ شدید شور مُخوره و میوه های نارسیده خُو ره میریزنه. ١٤ آسمو رقمِ یگ طومارِ پیچنده شده جَم شُد و هر کوه و جزیره از جای خُو بُردَه شُد. ١٥ اوخته پادشايونِ زمی، آدمای نامتُو، قومَنداانا، دَولتمَندا و قُدرتمَندا و هر غُلام و هر نفر آزاد خود ره د غار ها و د بَین قاده های کوه ها تاشه کده ١٦ د کوه ها و قاده ها گفت: "د بَلِه مو بُفتید و مو ره از چهره امزُو که د بَلِه تَخت شِشته و از غَضَبِ باره تاشه کُنید، ١٧ چراکه روزِ بُزرگِ غَضَبِ ازوا رسیده و کی میتنه که د برابر شی ایسته شُنه؟"

یگ صد و چل و چار هزار

۷^۱ بعد ازو دیدم که چار ملایکه د چار گوشه زمی ایسته يه، دم رُوی چار باد زمی ره میگیره تا باد دَبِله زمی و دَبِله دریا و دَبِله هیچ درخت پُف نکنه.^۲ اوخته يگ ملایکه دیگه ره دیدم که از جای آفتتو بُر شدو باله مییه و مهِر خُدای زنده ره قد خُودره. او دامزو چار ملایکه که دزوا قدرت دده شُدد تا د زمی و دریا ضَرَر برسنه، قد آواز بلند گفت:^۳ "تا زمانی که مو د پیشانه خدمتگارای خُدای خُموهر نزدے، د زمی و د دریا و د درختا ضَرَر نرسنید."^۴ اوخته تعداد کسای ره که مهِر شُدد شنیدم: از تمام طایفه های بنی اسرائیل يگ صد و چل و چار هزار نفر مهِر شد:

۵^۵ از طایفه یهودا دوازده هزار نفر مهِر شد.

از طایفه رئوبین دوازده هزار نفر مهِر شد.

از طایفه جاد دوازده هزار نفر مهِر شد.

۶^۶ از طایفه آشیر دوازده هزار نفر مهِر شد.

از طایفه نفتالی دوازده هزار نفر مهِر شد.

از طایفه منسی دوازده هزار نفر مهِر شد.

۷^۷ از طایفه شمعون دوازده هزار نفر مهِر شد.

از طایفه لاوی دوازده هزار نفر مهِر شد.

از طایفه یسّاکار دوازده هزار نفر مُهر شُد.

^٩ از طایفه زیوْلُون دوازده هزار نفر مُهر شُد.

از طایفه یوسُف دوازده هزار نفر مُهر شُد

و از طایفه بِنیامِین دوازده هزار نفر مُهر شُد.

گروه کله قد کالاهاي سفيد

بعد ازی دیدم که اونه، یگ گروه کله که هیچ کس اونا ره حساب کده نمیتنست، از هر میلت و طایفه و قوم و زیو د پیش روی تخت و د حضور باره ایسته شدد؛ د جان ازوا کالای سفید و د دستای ازوا شاخچه های درخت خرما بود ^{١٠} و اونا د آواز بلند چیغ زده مُوگفت:

”نجات د خدای مو تعلق دره“

که د بله تخت میشينه و د باره.“

تمام ملايكه ها د گرداگرد تخت و د گرداگرد بزرگا و چار موجود زنده ایسته بود و اونا د پیش تخت روی د خاک افتاد و خدا ره سجده کده ^{١٢} گفت:

سِتایش و جلال،

حِکمت و شُکرگُزاری،

حُرمت و قُوت و قُدرت

از خُدای مو باد، تا آبداللاباد. آمین.

اوخته يکی امزو بُزرگا از مه پُرسان کده گفت: "امی سفید پوشان کی آسته و از کجا

آمد؟"^{۱۴} ما دَز شی گفتم: "صاحب، خود تو میدنی!" اوخته او دَز مه گفت: "آمیا

کسای آسته که از عذاب سخت خلاص شده و کالای خُوره شُشته و دَخون باره سفید

کده.^{۱۵} امزی خاطر اونا دَپیشِ روی تَختِ خُدا آسته و شاو و روز او ره دَخانه شی عبادت

مُونه و امو که دَبَله تخت شِشته، اونا ره دَتَی خیمه خُوجای دده.^{۱۶} اونا دیگه هرگز

گُشنه و تُشننه نَمُوشه و آفتَو اونا ره نَمِيزنه و نَه ام کُدم گرمی سخت دَبَله ازوا مییه.

چون باره که دَمینکلِ تَخت ایسته يه، چوپون ازوا مُوشه و اونا ره سُون چشمehای آب^{۱۷}

حیات هِدایت مُونه و خُدا تمام آوِدیده ها ره از چیمای ازوا پاک مُونه."

^۱ وختیکه باره مهر هفتم ره واز کد، تقریباً نیم ساعت د عالم باله خاموشی برقرار شد.
^۲ ما امُو هفت ملایکه ره دیدم که د حضورِ خُدا ایسته یه و دزوا هفت شیپور دده شد.
^۳ اوخته یگ ملایکه دیگه آمده د پیشِ قربانگاه ایسته شد و اویگ آتشدانِ طلایی دشت.
 دمزو ملایکه بخور خوشبوی کلو دده شد تا او ره قد دعاهاي تمام مقدسین د بله قربانگاه
^۴ طلایی که د پیشِ روی تخت آسته، تقدیم کنه. ^۵ و دود بخور خوشبوی قد دعاهاي مقدسین
 از دستِ ملایکه د حضورِ خُدا باله رفت. ^۶ بعد ازو ملایکه آتشدان ره گرفته از آتشِ
 قربانگاه پُر کد و د بله زمی پورته کد. اوخته گرگ دراغ، آواز ها، آتشک ها و زلزله پیدا
 شد.

هفت شیپور

^۷ پس امُو هفت ملایکه که هفت شیپور دشت، آماده شد تا اونا ره د صدا بیره. ^۸ اوخته
 ملایکه اول شیپور ره د صدا اورد و زاله و آتش قد خون قتی تاه آمد و د بله زمی بارید و
 یگ سوم زمی و یگ سوم درختا و تمام علفای سوز ره سوختند. ^۹ و ملایکه دوم شیپور ره
 د صدا اورد و یکو چیز رقم کوه کله که د آتش موساخت د دریا آندخته شد و یگ سوم
 دریا د خون تبدیل شد ^{۱۰} و یگ سوم زنده جانای دریایی مرد و یگ سوم کشتنی ها نابود شد.

ملايکه سوم شيبور ره د صدا آورد و يگ ستاره كله رقم مَشعلِ در دده شده از آسمو تاه
 آمد و د بله يگ سوم درياها و چشمهاي آو افتاد.^{۱۱} نام امزو ستاره افستين بود. يگ
 سوم آها کلو تلخ شد و غدر مردم از خاطر آهاي تلخ شده مُرد.^{۱۲} ملايکه چارم شيبور
 ره د صدا آورد و يگ سوم آفتاو و يگ سوم ماهتو و يگ سوم ستاره ها زده شد، د اندازه
 که يگ سوم ازوا تريک شد و يگ سوم روز و يگ سوم شابه روشنی مند.^{۱۳} و د
 حالیکه توخ موكدم، شينیدم که يگ بُرج د حین پرواز د مينكل آسمو د آواز بلند موگيه:
 "واي، واي، د حال باشنه هاي زمي، بخاطر آواز شيبور هاي امزو سه ملايکه که
 "ونا د زودی د صدا ميره."

٩ وختي ملايکه پنجم شيبور ره د صدا آورد، ما يگ ستاره ره ديدم که از آسمو د زمي
 افتاد و کلى چاه بے آخر بلده ازو دده شد.^۱ او دان چاه بے آخر ره واز کد و از چاه يگ دود
 رقم دود تنور کله بُر شد و آفتاو و هوا د وسيلي دود چاه تريک شد.^۲ و از مينكل دود ملخ
 ها د بله زمي آمد و بلده ازوا قدرتی دده شد که رقم قدرت دمکجکاي زمي بود.^۳ بلده
 ازوا گفته شد که د علفاي زمي و گياه هاي سوز و درختا ضرر نرسنه، بلکه فقط د امزو
 مردمها ضرر برسنه که مهر خدا ره د پيشاني خوندراه.^۴ بلده ازوا اجازه کشتون مردم دده
 نشد، بلکه دزوا فقط اجازه دده شد که اونا ره مدت پنج ماه عذاب کنه و عذاب ازوا مثل
 درد-و-سوز نيش دمکجک بود که يگ نفر ره نيش ميزنه.^۵ د امزو روزا مردم مرگ طلب

مُونه، لِيکِن پَیدا نَمِيتَنَه، دَآرزوی مُردو أَسْتَه، وَلَى مَرَگ ازوا دُوتا مُونه. ^٧ شَكِيل امْزُو مَلَخ
ها رقمِ أَسْپ هَای بُود كَه بَلَدِه جَنَگ آماده شُدَه بَشَه. دَبَلِه سِر ازوا يِگ چِيز رقمِ تاج
طِلَّايِي الَّى بُود و چِهره هَای ازوا رقمِ چِهره إنسان. ^٨ مُوي هَای ازوا رقمِ مُوي خاتُونو الَّى و
دَندوناي شَي شِي مِثْل دَندوناي شير الَّى بُود. ^٩ أُونا زِرِه هَا رقمِ زِرِه هَای آيني دَشَت و آوازِ بال
هاي ازوا رقمِ آوازِ گاڈي هَای جَنَگي ڪلو بُود كَه قد أَسْپ هَا دَ جَنَگ مُودَوه. ^{١٠} أُونا رقمِ
دُمَكَجَك هَا الَّى دُم و نِيش دَشَت و دَدُم ازوا قُدرَت بُود كَه مرُدم ره بَلَدِه پَنج ماه عذاب
كُنه. ^{١١} أُونا دَبَلِه خُويِگ پادشاه دَشَت كَه او ملايِکه چاه بَسَ آخر بُود كَه دَ زِيون عِبراني
نَام ازو «آبَدون» أَسْتَه و دَيوناني او ره «أَپوليُون» مُوكَه. ^{١٢} «واي» اوَّل تير شُد. اينه، دُو
«واي» دِيگَه هنوز مَنَدَه كَه بعد ازِي مِيه.

^{١٣} ملايِکه شَشْم شِيپُور ره دَ صَدا أَورَد و ما يِگ آواز ره از مِينَكِل چار شاخِ قُريانِگاه
طِلَّايِي كَه دَ حُضُورِ خُدا أَسْتَه، شِينِيدُم. ^{١٤} و امُو آواز دَ امْزُو ملايِکه شَشْم كَه شِيپُور دَشَت
گُفت: "امُو چار ملايِکه ره كَه دَ دريای كِلِه فَرات دَ بَند أَسْتَه، خلاص کُو." ^{١٥} پس امُو
چار ملايِکه كَه بَلَدِه امزى ساعت و روز و ماه و سال آماده نِگاه شُدد، خلاص شُد تا يِگ
سِوّم بَشر ره بُكُشه. ^{١٦} تِعدادِ لشَكِير سَوارِه ازوا دُو صد مِيلِيون نفر بُود؛ ما تِعدادِ ازوا ره
شِينِيدُم. ^{١٧} أَسْپ هَا و سَوارِي ره كَه ما دَ روياي خُويِدُم، ايني رقمِ مَعْلُوم مُوشَد: زِرِه هَای
ازوا رنگِ آتشِي و كَبُود و زَرِد گوگِردِي دَشَت. سِرِ أَسْپ هَا رقمِ سِرِ شير الَّى مَعْلُوم مُوشَد
و از دان ازوا آتش، دُود و گوگِرد بُر مُوشَد. ^{١٨} دَ وسِيله امزى سِه بَلا يعني آتش، دُود و

گوگرد که از دانِ ازوا بُر مُوشُد، یگ سِوّم بَشَر كُشته شُد. ^{١٩} چون قُدرتِ آسپ ها دَ دان و دُم ازوا بُود؛ دُم های ازوا مِثِل مار های آسته که سر دَره و قد ازوا نیش مِیزنه. ^{٢٠} باقی بَشَر که دَ وسِیله امزی بَلا ها كُشته نَشد، هنوز ام از کارای دِست خُو توبه نَکد و پَرَستِش کدونِ جِنیات و بُت ها ره ایله نَکد، پَرَستِش بُت های طِلایی، نُقره‌یی، برِنجی، سنگی و چوبی ره که قُدرتِ دِیدو و شِنیدو و راه رفتو ره نَدشت. ^{٢١} امچنان اُونا از آدمگُشی و جادوگری و زِناکاری و دُزی توبه نَکد.

ملایکه و طومارِ ریزگَگ

١٠ اوخته یگ ملایکه قُدرتمندِ دِیگه ره دِیدم که از آسمو تاه مییه. او قد آور پوشنده شُدد و دَ بَلَه سر شی رنگین کَمو بُود. چهره ازو رقِم آفتَو الَّی و پایای شی رقمِ ستُون های آتش بُود. او دِست خُو یگ طومارِ ریزگَگ واژ شُده داشت. او پای راست خُو ره دَ دریا و پای چپ خُو ره دَ بَلَه زمی ایشت ^۳ و دَ آوازِ لِند رقمِ غُرشِ شیر چیغ زَد و غَیتیکه چیغ زَد، هفت گُرگُر دراغ آواز خُو ره بُر کد. ^۴ بعد ازو که هفت گُرگُر دراغ آواز خُو ره بُر کد، ما آماده شُدم که نوشتَه کُنم، لیکن یگ آواز از عالم باله شِنیدم که مُوگفت: "چیزای ره که هفت گُرگُر دراغ گفت مُهر کُو و اُونا ره نوشتَه نَکو."

٥ اوخته امُو ملایکه ره دِیدم که دَ بَلَه دریا و زمی ایسته بُود. او دِستِ راست خُو ره سُونِ

آسمو باله کد^۶ و دَ نامِ امْزو که تا آبَدالْلَاباد زِنده يَه و آسمو ره قد تمام چِيزای که دَ مَنه
شی أَسته و زمی ره قد تمام چِيزای که دَ مَنه شی أَسته و دریا ره قد تمام چِيزای که دَ مَنه
شی أَسته خَلق کده، قَسْم خورد و گُفت: ”دِیگه طال نَمُوخوره، بَلکِه دَ امْزو روزای که
ملایکِه هفتُم شِیپُور ره دَ صَدا میره، رازِ خُدا تکمیل مُوشه، امُورِ رقم که دَ خِدمتگارای خُ
يعنى دَ پَیغمبرا خبر دَده بُود.“

اوخته امُوازی ره که از عالم باله شِنیده بُودم، بسم قد مه گپ زَده گُفت: ”بورُو،
طومارِ واژ شُده ره از دِستِ ملایکِه که دَ بَلَه دریا و زمی ایسته يَه، بِگیر.“^۹ و ما دَ پیشِ
ملایکِه رفتُم و دَزُو گُفتُم که طومارِ ریزگَگ ره دَز مه بِدیه. او دَز مه گُفت: ”ای ره بِگیر
و بُخور. ای مَنه کَوره تُو ره تَلخ مُونه، لیکِن دَ دان تُو رقم عسل وَری شِیرین مَزه مِیدیه.“^{۱۰}
پس طومارِ ریزگَگ ره از دِستِ ملایکِه گِرفته خوردم. او دَ دان مه رقم عسل وَری
شِیرین بُود، مَگم وختیکه او ره قُورت کُدم، مَنه کَوره مه تَلخ شُد.^{۱۱} اوخته دَز مه گُفت:
”تو باید بسم دَ باره قَوم ها، مِلت ها، زِبونا و پادشايونِ کلو پیشگویی کنی.“

دو شاهِدِ خُدا

۱۱ بعد اُو بَلَدِه مه يَگ نَى دَده شُد که رقم چیو اندازه گیری بُود و دَز مه گُفته شُد:
”باله شُو و خانه خُدا و قُربانگاه ره اندازه بِگیر و تعدادِ کسای ره که دَ اونجی عِبادت

مُونه حِساب کُو. ^۲ لیکن حَولی بُرون خانه خُدا ره ايله بَدی و او ره اندازه نَگیر، چراكه او
بَلَدِه مِلت ها دَده شُدَه و اوナ بَلَدِه چَل و دُو ماھ شارِ مُقدَّس ره پایمال مُونه. ^۳ و ما دَدُو
شاھِد خُو که كالاي پلاسي پوشیده، قُدرت-و-اختيار مِيدِيم که مُدتِ يگ هزار و دُو صد و
شصت روز نَبُوت کُنه. ^۴ آميا دُو درختِ زَيْتون و دُو چراغدان آسته که دَ حُضورِ خُداوند
عالَم ايسته مُوشَه. ^۵ اگه کَدَم کس بِخایه که دَزوا ضَرَر بِرسَنه، آتش از دانِ ازوا بُر مُوشَه و
دُشمناي ازوا ره قُورت مُونه؛ و هر کسی که قَصَد کُنه دَزوا ضَرَر بِرسَنه باید امى رقم
کُشتَه شَنَه. ^۶ آميا قُدرت-و-اختيار دَره که آسمو ره بَند کُنه تا دَ دورونِ روزَاي که نَبُوت
مُونه بارش نَباره. امچنان اميَا دَ بَلَه آو ها قُدرت-و-اختيار دَره که اوNa ره دَ خُون تبَدِيل کُنه
و هر غَيْتِيكه بِخایه، زمى ره دَ هر رقم بَلَه گِرفتار کُنه.

و زمانی که اوNa شاهِدي دَدون خُو ره خلاص کُنه، «جانَوار وَحشى» که از چاه بَے آخر بُر
مُوشَه قد ازوا جنگ مُونه و دَ بَلَه ازوا پيروز مُوشَه و اوNa ره مُوكُشه. ^۷ جَسَد هَاي ازوا دَ
سَرَكِ عُمُومى شارِ كَلَه پورته مُوشَه که بَطَورِ كِنایه «سَدُوم» و «مِصر» گُفته شُدَه، دَ امزُو
جای که مَولاي ازوا ام دَ صَلِيب ميَخِكوب شُد. ^۸ مُدتِ سِه و نِيم روز مردُما از هر قَوم و
طايفه و زِيو و مِلت جَسَدَاي ازوا ره توخ مُونه و إجازه نَمِيديه که اوNa دَ قبر ايسته شَنَه.
^۹ باشِنَدَه هَاي رُوي زمى بخاطرِ ازوا خوشى مُونه و جشن گِرفته دَ يگدِيگه خُو تُحْفَه رَيَى
مُونه، چراكه امى دُو پَيغمبر باشِنَدَه هَاي رُوي زمى ره دَ عذاب کَدُد. ^{۱۰} لیکن بعد از سِه و
نِيم روز، روح حَيات از جانبِ خُدا دَ جَسَد هَاي ازوا دَرامَد و اوNa سِر پاياتِ خُو ايسته شُد و

کسای که اونا ره دید، سخت ترس خورد. ^{۱۲} اوخته اونا از عالم باله یگ آوازِ بلند ره شنید که دزوا گفت: "دِ اینجی باله بیید." و دَ حالیکه دشمنای ازوا توخ مُوكد اونا دَ آور سون آسمو باله رفت. ^{۱۳} دَ امزُو ساعت یگ زلزله قوى رُخ دَ دهْمِ حِصّه شار تباه شد و هفت هزار نفر دَ امزُو زلزله از بین رفت و کسای که باقی مَنْدَد، ترس خورده خُدای آسمو ره حمد-و-ثنا گفت. ^{۱۴} «وای» دوم تیر شد؛ اینه، «وای» سوم دُزودی مییه.

شیپورِ هفتُم

وختیکه ملایکه هفتم شیپور ره دَ صدا اُورد، آواز هایِ بلند دَ آسمو شنیده شد که مُوگفت: "پادشاهی دُنیا از خُداوند مو و از مسیح ازو شد و او تا آبدالاً باد پادشاهی مُونه." ^{۱۵} و امو بیست و چار بُزرگ که دَ حضور خُدا دَ بله تَخت های خو شِشتُد، رُوى دَ خاک افتاده خُدا ره پرستش کد ^{۱۶} و گفت:

"تو ره شُکر-و-سپاس مُوگی آی خُداوند-خُدای قادرِ مُطلق که أستی و بُودی،

چراکه تُو قُدرتِ بُزرگ خُوره دَ دِست گرفته و دَ پادشاهی کدو شروع کدے.

^{۱۷} مِلَّت ها قار شد و غَضَب از تُو آمد.

آلی زمانی رسیده که مُرده ها ره قضاوت کُنی

و د خِدمتگارای خُو یعنی د پیغمبرا

و د مُقدَّسین و د کسای که از نام تُو میترسه،

چی ریزه و چی کله، آجر ېدی

و کسای که زمی ره تباہ مُونه، اونا ره نابُود گُنی.

اوخته خانه خُدا د عالم باله واز شُد و صندوق عهد خُدا د مَنِه خانه شی دیده شُد و د^{۱۹}
أونجی آتشک، آواز ها، گرگ دراغ، زلزله و زاله شدید رُخ دد.

خاتُو و آژدار

۱۲ بعد اُزو یگ علامت بُزرگ د آسمو ظاهر شُد: یگ خاتُو قد آفتَو پوشنده شُدد و
ماهنتو د زیر پایای شی بُود و د سر خُو یگ تاج ازدوازده ستاره دشت.^۲ او شِکامتو بُود و
از درد زیدو و عذاب اولاد پیدا کدو ناله-و-فریاد مُوكد.^۳ بعد اُزو یگ علامت دیگه د
آسمو دیده شُد: د أونجی یگ آژدار کله سُرخ رنگ بُود که هفت سر و ده شاخ دشت و د
بَلِه هفت سر شی هفت تاج بُود،^۴ و دُم اُزو یگ سِوم ستاره های آسمو ره جم کد و د زمی
پورته کد. اوخته آژدار د پیش روی امز و خاتُون که د حال زیدو بُود، ایسته شُد تا امى که

باچه ازو پیدا شنه، باچه شى ره قورت کنه.^۵ اوخته امو خاتو يگ باچه زيد که او قد تياقت
آينى د بله تمام ملت ها حکمرانی مونه؛ و باچه ازو د حضور خدا و تخت شى بُرده شد.
و خود خاتو د ببابو دوتا کد، د يگ جای که از طرف خدا بله شى آماده شدد تا مدت
يگ هزار و دو صد و شصت روز د اونجى ازو نگاهدارى شنه.

اوخته د آسمو جنگ در گرفت. ميكائيل و ملايكه هاي شى قد آژدار جنگ کد و آژدار و
ملايكه هاي ازو ام قد ازوا جنگ کد. ^۶ ليکن آژدار نتنست پیروز شنه و دیگه بله ازوا د
آسمو جاي نمند. آژدار کله تاه پورته شد، آر امو مار قدیمي که نام شى إبليس و
شیطو آسته و تمام دنيا ره گمراه مونه، د زمى پورته شد و ملايكه هاي ازو قد شى قتي
پورته شد.

اوخته يگ آواز بلند ره از آسمو شنیدم که موگفت:

”آلی نجات و قوت و پادشاهی خدای مو
و قدرت مسیح ازو برمالا شد،
چون مدعی برaron مو
که شاو و روز د حضور خدا د بله ازوا تهمت موكد،

تاه پورته شد.

۱۱ اونا د وسیله خون باره

و د وسیله توره شاهدی خو د بله ازو پیروز شد،

چون اونا زندگی خوره د اندازه دوست ندشت که از مرگ بترسه.

۱۲ پس آی آسمونا و باشنده های شی،

خوشی کنید!

لیکن واي د حال شمو، آي زمي و دريا،

چراكه ايليس قد خشم-و-قار كلو د بله شمو تاه آمده،

چون او ميدنه که وخت شی کم استه. ”

۱۳ وختي آذدار ديد که د زمي پورته شده، او پشت امزو خاتو ره گرفت که باچه زيد.

۱۴ لیکن بله خاتو دو بال برج حکمه دده شد تا د امزو جاي که د ببابو بله شی آماده شد، پرواز کنه، د جايی که بله يگ زمان و زمان ها و نيم زمان، دور از نظر مار از شی

نگاهداری مُوشه.^{۱۵} اوخته مار از پُشت خاتُو، از دان خُو رقمِ دریا آو ایله کد تا سیل شی او ره گِرفته بُبره.^{۱۶} مگم زمی دَخاتُو کومک کده دان خُو ره واز کد و دریای ره که آژدار از دان خُو ایله کدد، قُورت کد.^{۱۷} اوخته آژدار دَبَلِه خاتُو قار شُد و رفت تا قد اولادای باقی مَنِدِه شی جنگ کُنه که احکامِ خُدا ره دَجای میره و شاهدی عیسیٰ ره محکم میگیره.^{۱۸} پس آژدار دَبَلِه ریگِ دریا ایسته شُد.

جانورِ وَحشی دریا

۱۳ اوخته دیدم که جانورِ وَحشی از دریا بُر مُوشه. او دَه شاخ و هفت سر داشت که دَبَلِه شاخای شی دَه تاج بُود و دَبَلِه سر های شی نام های کُفرآمیز نوشتہ شُدد.^۱ امو جانورِ وَحشی ره که دیدم رقمِ پلنگ بُود و پایای شی رقمِ پایای خرس و دان شی رقمِ دانِ شیر. آژدار قدرت و تخت و اختیاراتِ کلون خُو ره دَزو دَد.^۲ یکی از سر های اُزو رقمی معلوم مُوشد که زَخمِ کشنده خورده بشه، ولی امو زَخمِ کشنده شی جور شُدد. تمامِ دُنیا حیرو مَنِدد و از پُشتِ امزُو جانورِ وَحشی مورفت.^۳ مردم امو آژدار ره که اختیارات خُو ره دَجانورِ وَحشی دَه بُود پَرستیش کد و اونا امو جانورِ وَحشی ره ام پَرستیش کد و گفت: "کی مثلِ امزی جانورِ وَحشی آسته؟ کی میتنه دَضِدِ ازی جنگ کُنه؟"^۴ بَلِدِه اُزو یگ دان دَد شُد که توره های پُرکِبر و کُفرآمیز بُگیه و بَلِدِه اُزو اجازه دَد شُد که مُدتِ چل و دُو ماه از اختیارات خُو استفاده کُنه.^۵ او دان خُو ره دَکُفرگویی واز کد تا دَضِدِ خُدا، نام شی،

جایگاه شی و تمام موجودات^v که د عالم باله آسته کفر بُگیه. بلده ازُو اجازه دده شد که قد مقدّسین جنگ کنه و د بله ازوا زور شنه و بلده ازُو د بله هر طایفه و قوم و زیو و ملت اختیار دده شد.^A و ما دیدم که تمام باشنده های رُوی زمی امُو جانور وحشی ره پرستش مونه، تمام کسای که نام ازوا د شروع پیدایش عالم د کتاب حیات باره نوشه نشده، یعنی د کتاب حیات باره که حلال شد.^۹ هر کس که گوش شنوا ذره، گوش بگیره:

۱۰ اگه قرار بشه که کدم کس د اسیری بوره،

او د اسیری موره؛

اگه قرار بشه که کدم کس قد شمشیر کشته شنه،

او قد شمشیر کشته موشه.

امینجی صبر-و-حواله و ایمان مقدّسین د کار آسته.

جانور وحشی دوّم

۱۱ اوخته یگ جانور وحشی دیگه ره دیدم که از زمی بُر موشه. او رقم باره الی دو شاخ دشت و رقم آژدار توره مُوگفت.^{۱۲} او تمام اختیارات جانور وحشی اول ره د حضور شی د

کار مُوبِرد و زمی و باشِنده های شی ره وادار مُوكد که جانوَر وَحشی اوّل ره پَرستِش کُنه، امو ره که زَخم کُشنیده شی جور شُدد.^{۱۳} او مُعجزه های بُزرگ نِشو مِبَدَد، حتی دَپیشِ نظرِ مردم آتِش ره از آسمو دَزمی بارَند.^{۱۴} او باشِنده های رُوى زمی ره دَوسِیله مُعجزه های گمراه کد که بَلِدِه ازوِ اجازه دَدَه شُد تا دَحُضُور جانوَر وَحشی اوّل نِشو بِدیه. او امی کار ره کده دَزوا گُفت که يگ مُجَسِّمه جور کُنه، مُجَسِّمه امزُو جانوَر وَحشی ره که دَوسِیله شمشیر زخمی شُدد، ولے هنوز زِنده بُود.^{۱۵} دَجانوَر دُوم اجازه دَدَه شُد که دَمُجَسِّمه جانوَر وَحشی دَم بِدیه تا مُجَسِّمه امزُو جانوَر توره بُکَیه و تمامِ کسای ره که مُجَسِّمه جانوَر وَحشی اوّل ره پَرستِش نَمُوكد، بُکُشه.^{۱۶} امچنان او پَگ ره وادار کد، ریزه و کله، دَولتمَند و غَرِیب، غُلام و آزاد ره که دَبَلِه دِستِ راست یا دَپیشانِه ازوا نشان ایشته شُنه^{۱۷} تا هیچ کس نَنَته که خَرِید و فروش کُنه، بَغَیر از کسای که نشان دَره، یعنی نام یا عَدَدِ نامِ امزُو جانوَر وَحشی ره دَره.

دَاینِجی حِکمت دَکار آسته: هر کس که دانایی-و-بینایی دَره، عَدَدِ جانوَر وَحشی ره حِساب کُنه، چون ای عَدَدِ يگ آدم آسته و عَدَدِ شی شَش صد و شَصْت و شَش آسته.

باره دَبَلِه کوهِ صَهیون

۱۳ بعد ازو دِیدُم که اوته، باره دَبَلِه کوهِ صَهیون ایسته يه و قد ازو قتی يگ صد و

چل و چار هزار نفر دیگه ام بُود که نام باره و نام آته شی دَبَله پیشانی ازوا نویشه بُود.
اوخته ما یگ آواز ره از آسمو شنیدم که رقم آواز آوهای کلو و مثل آواز گرگ دراغ قوی
بُود. امو آواز ره که شنیدم رقم آوازی بُود که بريطنوازا آواز بريط خو ره بُرنکه. اونا د
پیش روی تخت و د حضور چار موجوِد زنده و بزرگا سرود نو میخاند و هیچ کس نتنست
امو سرود ره یاد بگیره، بغير از امزويگ صد و چل و چار هزار نفر که از زمی بازخرید
شد. امیا کسای استه که قد خاتونو یگجای نشده، چون پاکدامو استه. امیا هر جای
که باره بوره، از پیش شی موره. امیا از مینکل انسان ها بحیث اوّلباری بله خدا و باره
بازخرید شد. د دان ازوا هیچ دروغ پیدا نشد، چراکه اونا بے عیب استه.

سِه ملایکه

اوخته یگ ملایکه دیگه ره دیدم که د مینکل آسمو پرواز مُوكد و خوشخبری آبدی ره قد
خو دشت تا او ره بله کسای اعلان کنه که د روی زمی زندگی مونه، یعنی بله هر ملت
و طایفه و زیو و قوم. او د آواز بلند گفت: "از خدا بترسید و او ره سنتایش کنید، چون
ساعت شی رسیده که او قضاوت کنه. امو که آسمو و زمی و دریا و چشمehای او ره
پیدا کده، او ره پرستش کنید!"

د امزو غیت یگ ملایکه دیگه یعنی ملایکه دومی از پیش ازو آمده گفت: "سقوط کد،
بابل بزرگ سقوط کد! امو شار که پگ ملت ها ره وادر کد تا از شراب دیونه کنیده

زناکاری ازو وچی کنه سقوط کد.^۹ اوخته ملایکه سومی، از پشت ازوا آمده د آواز بلند گفت: "هر کسی که جانور وحشی یا مجسمه ازو ره پرستیش کنه یا نشان ازو ره د بله پیشانه یا د بله دست خو قبول کنه،^{۱۰} او ام از شراب غضب خدا که خالص آسته و د پیله خشم-و-قار خدا شیو شده، وچی مونه. او قد آتش و گوگرد د حضور ملایکه های مقدس و د حضور باره عذاب موشه^{۱۱} و دود عذاب ازوا تا آبدالabad باله موره. کسای که جانور وحشی و مجسمه ازو ره پرستیش مونه یا نشان نام ازو ره قبول مونه، اونا شاو و روز آرامش ندره.^{۱۲} د اینجی صبر-و-حواله مقدسین د کار آسته که احکام خدا ره د جای میره و ایمان خو ره د عیسی نگاه مونه.

اوخته یگ آواز ره از آسمو شنیدم که گفت: "نوشته کو: نیک د بخت امزو کسای که بعد ازی د راه مولا مومره." و روح موگیه: "آرے، اونا از زحمتای خو آرام موشه، چون اعمال ازوا اونا ره دمبال مونه."

شروع کار دروغگرا

د امزو غیت دیدم که اونه، یگ آور سفید پیدا شد و د بله ازو یگ کس رقم «باچه انسان» ششتد که یگ تاج طلایی د سر خو و یگ داس تیز دست خو دشت.^{۱۳} اوخته یگ ملایکه دیگه از خانه خدا برو آمده د آواز بلند د امزو کسی که د بله آور ششتد، گفت: "das خو ره بدون و درو کو، چون فصل درو رسیده و حاصل زمی پخته شده."

١٦

پس امُو کسی که دَبِلِه آُور شِشتُد، داس خُو ره دَبِلِه زمی دَوَند و حاصلِ زمی دِرَو شُد.

١٧

بعد ازُو یگ ملایکه دِیگه از خانه خُدا که دَعالِم باله استه، بُرو آمد و او ام یگ داس تیز داشت.^{١٨} دَامْزو غَیت یگ ملایکه دِیگه از قُربانگاه آمد که دَبِلِه آتش اختیار داشت و دَآوازِ بلند دَصَاحِب داس تیز گفت: "Dasِ تیز خُو ره بُدون و خوشه های انگور ره از تاگِ زمی جم کُو، چراکه انگورای شی پُخته شده." ^{١٩} پس امُو ملایکه داس خُو ره دَبِلِه زمی دَوَند و انگورای زمی ره جم کده دَچرخُشت کِله غَضَبِ خُدا آندخت. ^{٢٠} اونا دَمِنه چرخُشتی که بُرو از شار بُود، قد پای لَغه شُد و خُون از چرخُشت جاری شده تا بلندی قَيِضِه دانِ آسپ دَاندازه شونزده صد دَورِه إِستَدِیم رَیی شُد.

هفت ملایکه و هفت بَلَ

١٥

بعد ازُو یگ علامَتِ بُزرگ و عجیبِ دِیگه ره دَعالِم باله دیدُم: هفت ملایکه بُود که هفت بَلَ داشت که اونا بَلَ های آخری بُود، چون قد امزوا غَضَبِ خُدا تَكمیل شُد. اوخته یگ چیز ره دیدُم که رقمِ دریای شیشه که آتش خورده بشه، معلوم مُوشَد و کسای که دَبِلِه جانَوِر وَحشی و مُجَسمِه شی و دَبِلِه عَدَدِ نامِ ازُو پیروز شُدد، دَبَغلِ دریای شیشه ایسته بُود و بَرِبط های خُدا دَدستای ازوا بُود. ^٣ و اونا سُرُودِ مُوسَى خِدمتگارِ خُدا و سُرُودِ باره ره میخاند و مُوگفت:

”کارای تُو بُزُرگ و عجیب آسته،

آی خُداوند-خُدای قادرِ مُطلق!

راه های تُو عادلانه و حق آسته،

آی پادشاهِ مِلت ها.

آی خُداوند، کی آسته که از تُو نَترسه^۳

و د نام تُو حمد-و-ثنا نَگیه؟

چون تنها تُو مُقدَّس آستی

و تمامِ مِلت ها مییه

و د حُضور تُو پَرسِتِش مُونه،

”چراکه کارای عادلانه تُو بَرَمَلا شُده.“

بعد ازی دیدم که مقدَّسَتَرین جای جایگاهِ صندوقِ شهادت دَ عالم باله واز شد^۴ و از

مُقدَّسَتَرِین جای، هفت ملایکه قد هفت بَلَا بُرُو آمد.^۱ اوخته یکی امزُو چار مَوْجُودِ زِنده، دَ امزُو هفت ملایکه هفت پیله طِلَّابی دَد که پُر از غَضَبِ خُدای بُود که تا آبَدالاَباد زِنده يَه. مُقدَّسَتَرِین جای از دُودِ بُزْرگی-و-جلالِ خُدا و از قُدرتِ ازو پُر شُد و هیچ کس دَ مُقدَّسَتَرِین جای دَرآمده نَتَنِست تا غَيِّتِیکه هفت بَلَای امزُو هفت ملایکه تکمیل شُد.

هفت پیله غَضَبِ خُدا

۱۶ اوخته یگ آوازِ بِلند ره از مُقدَّسَتَرِین جای شِنِیدُم که دَ امزُو هفت ملایکه مُوگُفت: "بورِید و امُو هفت پیله غَضَبِ خُدا ره دَ بَلَه زمی شیو کُنید." ^۲ پس ملایکه اولی رفته پیله خُوره دَ بَلَه زمی شیو کد و دانه های بَدرنگ و دَرداک دَ جانِ مردمای بُر شُد که نشانِ جانوَرِ وَحشی ره دَ جِسم خُور داشت و مُجَسِّمه ازو ره پَرَسِتش مُوكد. ^۳ بعد ازو ملایکه دَوَم پیله خُوره دَ دریا شیو کد و دریا رقمِ خُونِ مُرده جور شُد و تمامِ زِنده جانای که دَ دریا بُود، مُرده. ^۴ بعد ازو ملایکه سِوَم پیله خُوره دَ دریاچه ها و چشمِ های آو شیو کد و اونا خُون جور شُد. ^۵ اوخته از ملایکه که نِگاهوَانِ آو ها آسته شِنِیدُم که مُوگُفت:

"تو عادِل آستَى، آی قُدُوس که آستَى و بُودَى،

چُون امی رقم قضاوت کدی؟

^۶ ازی که اونا خُونِ مُقدَّسِین و پیغمبرا ره ریختند،

تُو بَلِدِه ازوا خُون دَدی تا وُچی کُنه، چُون اونا سَزوَار شی بُود. ”

^۷ و شِنیْدُم که از قُربانگاه جواب آمده گفت:

”آرے، آی خُداوند-خُدای قادرِ مُطلق،

قضاوَت های تُو بَرَحق و عادِلانه آسته. ”

بعد اُزو ملایکه چارم پیله خُوره دَبَلِه آفتَو شیو کد و دَآفتَو قُدرت دَده شُد که مردم ره
قد آتش خُوبُسوزَنه. ^۹ مردم از شِدَّتِ گرمی سوخت و دَنامِ خُدای که دَبَلِه امزی بَلا ها
قدرت دَره، کُفرگویی کد و اونا توبه نَکد و خُدا ره سِتایش نَکد. ^{۱۰} بعد اُزو ملایکه پنجم
پیله خُوره دَبَلِه تَختِ جانَورِ وَحشی شیو کد و پادشاهی اُزو دَتَریکی غَرق شُد. مردمما از
درد-و-رنج زِيونای خُوره میخَیید ^{۱۱} و بخاطرِ درد ها و دانه های خُوره دَخُدای آسمو کُفر
مُوگُفت و از کارای خُوتوبه نَمُوكد.

بعد اُزو ملایکه شَشم پیله خُوره دَبَلِه دریای کِلِه فَرات شیو کد و آوِ اُزو خُشک شُد تا
راه بَلِدِه پادشايونِ مشرق آماده شُنَه. ^{۱۲} اوخته دِیدُم که از دانِ آزادار و از دانِ جانَورِ وَحشی
و از دانِ پیغمبرِ دروغی سِه ارواحِ ناپاک رقمِ قوقری بُرو میبیه. ^{۱۳} اونا آرواحِ جِنیات آسته

که مُعجزه ها نِشو مِیدیه و دَپیشِ پادشايونِ تمامِ دُنیا موره تا اُونا ره بَلِدِه جنگِ روزِ بُزرگِ
خُدای قادرِ مُطلق جَم کُنه. ^{۱۵} - "اینه، ما رقمِ دُز مییم! نیک دَبَختِ کسی که بیدار مُومنه
و کالا دَ جان خُو دَره؛ نَشنه که او لُچ راه بوره و مردم شرمگاهِ ازو ره بِنگره." ^{۱۶} - پس
امو سِه ارواحِ ناپاک، پادشايو رو دِیگ جای که دَ زیونِ عبرانی «هار مَگیدون» مُوگیه،
جم کد.

^{۱۷} بعد ازو ملايكِ هفتُم پیله خُو ره دَهوا شيو کد و يگ آوازِ بلند از مُقدَّسَتَرین جای، از
تَخت بُر شُده گفت: "خلاص شُد." ^{۱۸} اوخته آتشک ها، آواز ها و گُرگُر دراغ ها پیدا شُد و
يگ زلزله قوى رُخ دَد، رقميکه از پيدايشِ انسان دَ رُوي زمي امي رقم زلزله قوى و شدید
واقع نَشَد. ^{۱۹} شارِ بُزرگ دَسِه حِصَه تقسيم شُد و شاراي مِلت ها بیرو شُد. خُدا بايُلِ
بُزرگ ره ياد کد و جامِ شرابِ غَضَب خُو ره دَزُو دَد. ^{۲۰} و تمامِ جزيره ها گُم شُد و کوه ها
پیدا نَشَد. ^{۲۱} از آسمو زاله های کَلَه دَ اندازه شَش سير دَبِله مردم باريده و مردم بخاطرِ
امزي زاله ها دَ خُدا كُفر مُوگفت، چراكه امي بَلا کلو سخت بُود.

فاحِشِه کَلَه

^{۱۷} اوخته امزُو هفت ملايكِ که هفت پیله داشت، يگ شى أَمَدَه دَز مه گفت: "بيه
که جَزای امزُو فاحِشِه کَلَه ره که دَبِله آوهای کلو شِسته، دَز تُو نِشو بِدیم. پادشايونِ

دنیا قد اُزو زنا کد و باشِنده های رُوی زمی از شرابِ زنای اُزو نشه شد. ”^۳ پس امُو

ملایکه مَرَه دَ روح دَ یگ بیابو بُرد و دَ اُونجی یگ خاتُو ره دِیدُم که دَ بَلَه جانَورِ وَحشی

سُرخ رنگ سوار شُدد که جِسم جانَور پُر از نام های کُفرآمیز بُود و هفت سر و دَ شاخ

دَشت. امُو خاتُو کالای اَرغوانی و سُرخ رنگ دَ جان خُو دَشت و قد طِلّا و دانه های

قِيمَتی و مُرواری ها مُزَيْن شُدد. او دِست خُو یگ پیله طِلّایی دَشت که پُر از بَدکاری و

نِجاستِ زنای شی بُود. دَ بَلَه پیشانه اُزو اینی نام نوشتہ بُود که یگ راز آسته: «بَايُلِ

بُزرگ، آبه فاحِشہ ها و نِجاستِ زمی.»^۴ و ما دِیدُم که امُو خاتُو از خُون مُقدَّسین و از

خُون شاهِدای عیسیٰ نشه بُود و ما از دیدون اُزو بے اندازه حَیرَو شُدم. لیکن امُو ملایکه

دَز مه گفت: ”چرا حَیرَو شُدم؟ ما رازِ خاتُو و رازِ امزُو جانَورِ وَحشی ره که هفت سر و دَه

شاخ دَره و خاتُو ره دَ بَلَه خُو مُوبِره دَز تُو بیان مُونم.^۵ امُو جانَورِ وَحشی ره که دیدی، یگ

زمان بُود، مگم آلی نِبیه؛ او دَزُودی از چاه بے آخر بُر مُوشہ و سُون نابُودی خُو موره.

باشِنده های رُوی زمی که نام های شی از شُروع پیدایشِ عالم دَ کِتابِ حیات نوشتہ نَشده،

از دیدونِ امزی جانَورِ وَحشی حَیرَو مُوشہ، چراکه او یگ زمان بُود، و آلی نِبیه ولے دَ آینده

میبیه.

دَ اینجی ذهنی دَ کار آسته که حِکمت دَشتہ بَشه: امُو هفت سر، هفت تِپه آسته که خاتُو دَ

بَلَه شی شِشته. اونا امْچنان هفت پادشاه آسته^۶ که پنج ازوا سقوط کده؛ یگ شی آسته و

دِیگِه شی هنوز نَمَدَه و غَیتیکه بیبه، او باید بَلَدِه یگ مُدَّتِ کم بُمنه.^۷ امُو جانَورِ وَحشی

که يېگ زمان بُود و آلی نېيې، او پادشاھ هشتم آسته و د امزو هفت تعلق دَرَه و سُونِ نابُودی
خُو موره.^{١٢} و امو دَه شاخ ره که دیدی، اونا دَه پادشاھ آسته که هنوز دَپادشاھی نَرسِیده،
ليکن بَلَدِه ازوا إختيار دَدَه مُوشَه که مُدَّتِ يېگ ساعت قد جانوَرِ وَحشى قَتَى پادشاھی کُنه.
اميَا يېگ مقصد دَرَه و قُدرَت و إختيار خُو ره دَ جانوَرِ وَحشى مِيدِيه.^{١٣} اونا دَضِيدِ باره
جنگ مُونه، ليکن باره دَبَلِه ازوا پیروز مُوشَه، چراکه او رَب-الارياب و شاهِ شاهان آسته و
کسای که قد اُزو قتى آسته کُوي شُدَه ها و إنتِخاب شُدَه ها و وفادار آسته.

بعد اُزو ملايکه دَز مه گفت: "امو آو ها ره که دیدي، جاي ره که فاحشه شِشته، اونا
قوم ها، جماعت ها، مِلت ها و زِيونا آسته.^{١٤} و امو دَه شاخ و جانوَرِ وَحشى ره که دیدي،
أونا از فاحشه بَدْبُر مُوشَه و او ره بیرو کده لُچ-ولَق ايله مُونه؛ اونا گوشت اُزو ره مُوخوره
و او ره دَ آتش مُوسوَزَنه.^{١٥} چون خُدا اي ره دَ دل های ازوا قرار دَدَه که مقصد اُزو ره پُوره
کُنه و إتفاق کده پادشاھي خُو ره دَ جانوَرِ وَحشى تسلیم کُنه تا کلام خُدا پُوره شُنَه.^{١٦} و
امو خاتُو ره که دیدي، او شارِ بُزُرگ آسته که دَبَلِه پادشاھيون زمي حُكمرانی مُونه."

سُقوطِ شارِ بايُل

١٨ بعد اُزو يېگ ملايکه دِيگه ره دِيدُم که از آسمو تاه مييَه. او قُدرَت-و-إختيارِ گلو
دَشت و زمي از شِكوه-و-جلال شى روشو شُد. او دَ آوازِ بلند چيغ زَدَه گفت:

”سُقُوطٌ كَدَ، بَابُلٌ بُزُرْگٌ سُقُوطٌ كَدَ!

أو جای بُود-و-باشِ جنیات جور شده،

پناهگاهِ هر روحِ ناپاک

و پناهگاهِ هر مُرغَكِ ناپاک و نَفَرَتَ آنگیز.

چون پگِ مِلتَ ها از شرابِ دیونه کُننِدِه زِناکاری ازُو وُچی کده^۳

و پادشايونِ دُنيا قد ازُو زِنا کده

و تُجارتِ دُنيا از عیاشی کَلُونِ ازُو دولتمَند شده.

اوخته يگ آوارِ دِيگه ره از آسمو شِينیدم که مُوكُفت: ”آي قَومَ مَه، از مَنِه ازُو بُرْ شُنيد،^۴ نَشُنه که دَگَناه های ازُو شَريِيك شُنيد و بَلاهای شى دَبَله از شُمو بَبيه،^۵ چراكه گَناه های ازُو تا آسمو رَسيده و خُدا شرارت های شى ره دَياد خُو آورده.^۶ چيزی ره که او دَده، بَلَدِه شى پس بَدِيد و مُطابِقِ اعمالِ ازُو دُوچند شى ره دَزُو پس بَدِيد. دَجامى که او گَث کده، دُو برابر بَلَدِه شى گَث کَنيد.^۷ دَاندازِه که او خود خُو ره شان-و-شَوَّكَت دَد و عَياشى کد، دَامِزُو اندازه او ره عذاب و غَمَ بَدِيد، چراكه دَدل خُو مُوكِيه: ’ما مِثْلِ مَلِكَه شِشتُم و بَبيوه^۸

نِیمِیم و هرگِز غَم نَمِینَگُرْم.^٩ پس بَلَاهَايِ اُزو دَيگ روز دَبَلَه اُزو مَيَيه، يَعْنِي مَرَگ و مَاتَم و قَحْطَى؛ و اُو دَآتِش مُوسَوْزَه، چُون خُداوند-خُدَائِي کَه اُو رَه قَضاَوت مُونَه، قُدرَتَمَند أَسْتَه.

پادشايون زمی کَه قد شَى زِنا کَده و قد اُزو دَ عِيَاشِي زِنَدَگِي کَده، وختی دُود سوختون اُزو رَه بِنَگَرَه، دَ حَالِ اُزو چَخْرَا و مَاتَم مُونَه.^{١٠} اُونَا از تَرَسِ عَذَابِ اُزو دُور اِيَسْتَه شُدَه، مُوگِيه:

‘واي، واي، آي شارِ بُزُرَگ! آي بايُل، آي شارِ زورُتُو،

کَه دَيگ ساعت جَزَاي تُو دَبَلَه تُو آمَد!

١١ تُجَارَى دُنيا بَلَدِه اُزو چَخْرَا و مَاتَم مُونَه، چِرا کَه دِيگَه هِيَچْ كَس مَال-و-أَسْبَابِ ازوا رَه نَمِيَخَرَه،^{١٢} نَه طِلَّا و نُقْرَه و سَنَگَايِ قِيمَتَى و مُروارِي هَاي ازوا رَه؛ نَه كَتَان نَرم و رَختِ اَرْغَوانِي و اَبْرِيشُم و رَختِ سُرَخ رِنَگِ ازوا رَه؛ نَه هَر رقم چِيو هَاي خوشُبُوي و رقم رقم چِيزَاي صَدَفَى و هَر رقم چِيزَاي چِيو قِيمَتَى، بِرنَجِي، آيَنى و سَنَگِ مَرَمَرى ازوا رَه؛^{١٣} نَه دارِچِينِي و مَسَالَه دِيگ و عَطَرِ هَا و مُر و كُنْدَرِ ازوا رَه؛ نَه شَراب و روغونِ زَيْتُون و بِهَتَرِين آرد و گَنْدُم ازوا رَه؛ نَه گَاو و گَوْسِپُو و آسَپِ هَا و گَادِي هَاي ازوا رَه و نَه جِسم هَا و جَان هَاي إنسان هَا رَه.^{١٤} اُونَا دَزُو مُوگِيه: ‘امُو مَيَوه کَه جَان تُو دَ آرْزُوي شَى بُود، از

پیش تُو رفت و تمامِ شان و شَوَّکَتْ تُو از بَيْن رفت و اُونا دِیگه هرگِز پیدا نَمُوشَه.

١٥ تُجَارَای امزى چِيزا که امزُو شار دَولَتَمَند شُدَه، از ترسِ عذابِ اُزو دُور ایسته مُوشَه و

١٦ چخرا و ماتم کده مُوگیه: 'واي، واي! آي شارِ بُزرگ که کالاي کتانِ نَرم و رَختِ

آرغوانى و سُرخ رَنگ دَ جان تُو بُود و قد طِلّا و دانه هاي قِيمَتَى و مُرواري ها مُزَيَّن بُودَ!

١٧ دَ يَگ ساعت اميقس داريي گلوى تُو از بَيْن رفت!

و تمامِ كِشتَى وانا و مُسافِرَاي كِشتَى، خِدمتَگارَاي كِشتَى و پَگ کسای که کار-و-بار شى دَ

درِيَا بُود، دُور ایسته شُد ١٨ و غَيْتِيکه دُودِ سوختونِ اُزو ره دِيد، اُونا فرياد کده گفت: 'كَدَم

شار رقمِ امزى شارِ بُزرگ آلى بُودَه؟' ١٩ و اُونا خاك دَ سر خُو آندخته چخرا و ماتم کد و

چيغ زَده گفت: 'واي، واي دَ حالِ شارِ بُزرگ که دَ أُونجَى تمامِ کسای که دَ درِيَا كِشتَى

دَشت، از داريي شى دَولَتَمَند شُدَ! او دَ يَگ ساعت بيرو شُدَ!' ٢٠ آي آسمو، بلده نابُودَى

اُزو خوشى كُو! آي مُقدَّسِين و رسُولا و پيغمبرَا خوشى كُنِيد! چراكه خُدا دَ حق شُمو دَ ضِدِ

اُزو قضاوت کد. "

٢١ اوخته يَگ ملايكه قُدرَتَمَند، يَگ سنگ ره که رقمِ سنگِ آسيا آلى كَله بُود گِرفته دَ درِيَا

پورته کد و گفت: "اميظور قد شِدَّت شارِ بُزرگ بايُل سرنگون مُوشَه و دِيگه هرگِز پیدا

نَمُوشَه. ٢٢ آوازِ بَرْبَطَنَوازا و بَيْت خانا و تولهچى ها و شيبورنَوازا دِيگه هرگِز دَز تُو شِنِيدَه

نَمُوشَه و هيچ صَنعتَگر از هيچ كِسب دِيگه هرگِز دَز تُو پیدا نَمُوشَه. آوازِ سنگِ آسيا دِيگه

هرگز دَزْ تُو شِنِيده نَمُوشَه.^{۲۳} روشنی چراغ دِیگه هرگز دَزْ تُو روشنی نَمِیدیه و آواز بیری و داماد دِیگه هرگز دَزْ تُو شِنِيده تَمُوشَه، چراکه تُجاري تُو دَبَلَه مردمای دُنيا باداري کد و دَ وسِيله جادوگری تُو تمام مِلَت ها گُمراه شُد^{۲۴} و دَزْ تُو خُون پیغمبرا و مُقدَّسِين و تمام کسای که دَ رُوي زمی دَ قتل رسِيد، پیدا شُد.

خوشی دَ عالم باله

١٩ بعد ازی چيزا يگ آوازِ بلند ره شِنِيدم که رقم آواز جمعیت کله الی دَ عالم باله مُوكفت:

”حمد-و-ثنا دَ خُداوند!

نجات و جلال و قُدرت از خُدای مو أَسته،

٢ چراکه قضاوت اُزو دُرُست و عادلانه يه.

أَو دَبَلَه فاحِشه کله قضاوت کد،

که دُنيا ره قد زناکاري خُو فاسِد کده.

اوِ اِنْتِقَامِ خُونِ خِدْمَتَگَارَى خُو ره اُزُو گِرَفت.

^۳أُونَا بِسْمِ گُفت:

”حَمْدٌ وَ شَنَا دَخْداَوَنْدَ!

دُودِ شَارِبَابُل تا آبَدَالَابَاد بالَّهِ مُورَه.

^۴أَوْخَتَهِ اَمُو بِيِسْت وَ چَارِ بُزُرْگ وَ چَارِ مَوْجُودِ زِنْدَهِ رُوَى دَخَاكِ أُفْتَدَهِ خُدَاءِ رَه كَه دَبَلَهِ تَحْتَ شِشْتَدَ، سَجَدَهِ كَد وَ گُفت: ”آمِين، حَمْدٌ وَ شَنَا دَخْداَوَنْدَ!

^۵بَعْدِ اُزُو از تَحْتِ يَكِ آوازِ بُرْ شُد كَه مُوكَفَت:

”خُدَاءِ مو ره حَمْدٌ وَ شَنَا بُكَيِيدَ،

آيِ تمامِ خِدْمَتَگَارَى اُزُو،

آيِ تمامِ كَسَايِ كَه اُزُو تَرسَ دَرِيدَ،

”چَى رِيزَه وَ چَى كَلَهَ.

دَ امْزُو غَيْتِ يِكَ چِيز ره شِنِيدُم که رقمِ آوازِ جمعیتِ کله بُود، رقمِ آوازِ آوهای کلو و رقمِ آوازِ گُرگُر دراغ های قَوی که مُوگفت:

”حمد-و-ثنا د خُداوند!

خُداوند-خُدای مو،

امُو قادرِ مُطلق پادشاهی مُوکنه.

▼ بِیید که شادی و خوشحالی کنى

و او ره بُزرگی-و-جلال بَدی!

چون زمانِ توى باره رسِیده

و بیرى شى خود ره آماده کده؛

▲ دَزُو اجازه دَدَه شُدَه

تا كتانِ نَرم و روشو و پاک بُپوشه.”

مقصدِ کتانِ نَرِم اعمالِ نیکِ مُقدَّسِین آسته.

اوخته ملایکه دَز مه گفت: "نوِشته کُو: نیک دَبَختِ کسای که دَمِهمانی توی باره دعَوت شدَه!" او امچنان دَز مه گفت: "اینمیا کلامِ حقیقی خُدا آسته." ^{۱۰} و ما دَپیش پای شی اُفتَدُم تا او ره سَجده کُنُم، لیکن او دَز مه گفت: "ای کار ره نَکُو! ما قد ازْتُو و قد پِرارون تُو که دَبارِه عیسیٰ مسیح شاهِدی میدیه، همکار آَسْتُم. تنها خُدا ره سَجده کُو! چُون شاهِدی عیسیٰ روح نَبَوت آسته."

اوخته دِیدُم که آسمو واز شُد و دَأونجی یگ اَسپ سفید بُود که نامِ سوار شی «آمِین» و «حق» بُود؛ او قد عدالت قضاوت مُونه و جنگ مُوکُنه. ^{۱۲} چیمای شی رقمِ آَنگِه آتش بُود و دَبَله سر شی تاج های کَلو؛ یگ نام دَزو نوِشته بُود که هیچ کس نَمُوفامه بغیر از خود شی. ^{۱۳} او یگ چَپَن دَجان خُو دَشت که دَخُون غوُثه شُدد و نام اُزو «کلامِ خُدا» گفته مُوشُد. ^{۱۴} لشکر های آسمانی که دَبَله اَسپ های سفید سوار بُود و کالاهای کتانِ سفید و پاک دَجان خُو دَشت، از پُشتِ اُزو مورفت. ^{۱۵} از دانِ اُزو شمشیر تیز بُر مُوشه تا قد اُزو مِلت ها ره بِزَنَه. او قد سوُره آینی دَبَله ازوا حُکمرانی مُونه و چرخُشتِ شرابِ غَضَبِ خُدای قادرِ مُطلق ره قد پای خُو لَغَه مُونه. ^{۱۶} دَچَپَن و ران شی اینی نام نوِشته یه: «شاه شاهان و رَب-الارباب.»

اوخته دِیدُم که یگ ملایکه دَآفتَو ایسته بُود و دَتمامِ مُرغَکوی که دَمینکلِ آسمو پَر

میزنه، د آوازِ بِلند چیغ زَدَه گفت: ”بِیْد، بَلِدِه مِهْمَانِی کِتَه خُدا جَم شُنِید^{۱۸} تا گوشتِ پادشايو، گوشتِ قومَندا، گوشتِ قُدرتَمندا، گوشتِ آسپ ها و سواراي ازوا و گوشتِ پگِ مردمَا ره بُخورِيد، از آزاد و غُلام و کله و ریزه ره.“

بعد ازو دِیدُم که جانورِ وحشی و پادشايونِ زمی قد لشکر های خو جم شد تا قد امزُو آسپ-سوار و لشکر شی جنگ کنه.^{۲۰} و جانورِ وحشی گرفتار شد و قد ازو قَتَی پیغمبرِ دروغی که د حُضُورِ ازو مُعجزه ها نِشو مِیدَد، ام گرفتار شد. پیغمبرِ دروغی د وسیله امزُو مُعجزه ها کسای ره گمراه کُدد که نشانِ جانورِ وحشی ره د جسم خو قبول کُدد و مُجسمه ازو ره پَرستِش مُوكد. اونا هر دُوى شی زِنده د دریاچه آتش که قد گوگرد سوخته رَیی بُود، آندخته شد.^{۲۱} باقی مَنِدِه ازوا قد شمشیری که از دانِ آسپ-سوار بُر مُوشَد، کُشته شد و تمامِ مُرغَکو خود ره از گوشتِ ازوا سیر کد.

هزار سال

۲۰ بعد ازو يگ ملايکه ره دِیدُم که از آسمو تاه مييه و کلی چاه بے آخر د پيش شی أسته و يگ زنجيرِ کله د دست خو دره.^۲ او امو آژدار يعني امو مارِ قدِيمی ره که ابلیس يا شیطو أسته، دستگیر کد و او ره بَلِدِه يگ هزار سال بَندی کد.^۳ او ره د چاه بے آخر پورته کد و درگه ره د روی شی بسته کده مهر-و-لاک کد تا او دیگه نَتَنَه مِلت ها ره

گُمراه کُنه تا امُو يگ هزار سال د آخر بِرَسَه. بعد اُزو بَلَدِه يگ وخت کم او باید ایله شُنَه.

اوخته تَخت ها ره دِيدُم و کسای که دَبَلَه ازوا شِشْتُد، دَزوا اِختیار قضاوت کدو دَدَه شُد.^{۱۳}

امچنان جان های کسای ره دِيدُم که بخاطرِ شاهدی عیسیٰ و بخاطرِ کلامِ خُدا سر شی

بُریده شُدُد. اونا جانورِ وَحشی و یا مُجَسِّمِه شی ره پَرَسِتِش نَكُدد و نشانِ اُزو ره دَپیشانه

ها و یا دَدِستای خُو قُبُول نَكُدد. اونا دُوباره زِنَدَه شُد و هزار سال قد مسیح حُکمرانی کد.

لیکِن باقی مُرَدَه ها تا آخرِ امْزو يگ هزار سال دُوباره زِنَدَه نَشَد. ای «دُوباره زِنَدَه شُدونِ»^{۱۴}

اَوْلَى أَسْتَه. نیک بَخت و مُقدَّس أَسْتَه کسی که د «دُوباره زِنَدَه شُدونِ» اَوْلَ حِصَّه دَرَه.

مرگِ دَوْم دَبَلَه ازوا قُدرَت نَدرَه، بَلَکِه اونا از طرفِ خُدا و مسیح پیشوایو مُوشَه و هزار

سال قد اُزو حُکمرانی مُونَه.

محکوم شُدونِ شَيْطَو

وختیکه امُو هزار سال تکمیل شُد، شَيْطَو از بَندَی گَرَی خُو آزاد مُوشَه^{۱۵} و بُرُو مییه که

مِلَّت ها ره دَچار گوشه زمی، یعنی جُوج و ماجُوج ره گُمراه کُنه تا اونا ره بَلَدِه جنگ کدو

جَم کُنه که تِعدادِ ازوا رقمِ ریگِ دریا الی کَلو أَسْتَه. اونا دَپراخی زمی دَحرَکت شُد و

اُردوگاهِ مُقدَّسین و شارِ دوست-دَشَتَنَی ره محاصره کد، لیکِن از آسمو آتش بارِید و اونا ره

قُورَت کد.^{۱۶} و اِبِلِیس که اونا ره گُمراه کُدد، دَدَریاچه آتش و گوگِرد آندخته شُد، دَجایی

که جانورِ وَحشی و پیغمبرِ دروغی آندخته شُدُد. اونا شاو و روز تا آبَد عذاب مُوشَه.

قضاياَتِ مُرْدَه هَا

اوخته يگ تَختِ کِتِه سفید و امُوره که دَبَلِه شی شِشتُد دِيدُم. آسمو و زمی از حُضُورِ^{۱۱} اُزو دُوتا کد و بَلِدِه ازوا هیچ جای پیدا نَسْد. ^{۱۲} و مُرْدَه هَا ره ریزه و کِتِه شی ره دِيدُم که دَپیشِ تَخت ایسته بُود و کِتابا واژ شُد. يگ کِتابِ دِیگَه ام واژ شُد که او کِتابِ حیات بُود و مُرْدَه هَا دَمُطَابِقِ اعمال خُو که دَکِتابا نوشتَه بُود، قضاوت شُد. ^{۱۳} و دریا مُرْدَه های ره که دَمَنِه شی بُود پس دَد؛ و مَرَگ و عالمِ مُرْدَه هَا ام مُرْدَه های ره که دَمَنِه ازوا بُود پس دَد و هر کس دَمُطَابِقِ اعمالی که انجام دَده بُود، قضاوت شُد. ^{۱۴} بعد اُزو مَرَگ و عالمِ مُرْدَه هَا دَدریاچه آتش آندخته شُد. دریاچه آتش مَرَگ دُوم آسته. ^{۱۵} و هر کسی که نام شی دَکِتابِ حیات نوشتَه نَسْدَه بُود، او دَدریاچه آتش آندخته شُد.

اورُشَلَیْمِ نَو

۲۱ بعد اُزو يگ آسمونِ نَو و يگ زمینِ نَو دِيدُم، چون آسمونِ اوّل و زمینِ اوّل از بَيْن رفت و دریا دِیگَه وجود نَدَشت. ^۱ اوخته شارِ مُقدَّس، یعنی اورُشَلَیْمِ نَو ره دِيدُم که از طرفِ خُدا از آسمو تاه میبیه، آماده شُدَه رقمِ يگ بیری که بَلِدِه شوی خُو جور شُدَه. ^۲ و يگ آوازِ بِلَند ره از تَخت شِنِیدُم که مُوگفت:

”اینه، جایگاه خُدا د مینکلِ انسان ها آسته“

و او قد ازوا بُود-و-باش مُونه.

أُونا قَوم ازْو مُوشة

و خُدا خود شی قد ازوا مُوشة

و خُدای ازوا مُوشة.

۱۵ او هر آودیده ره از چیمای ازوا پاک مُونه.

و مَرگ دِیگه نِیسته

و ماتم و ناله و دَرد و جُود نَمِیدَشته بَشه،

چراکه چیزای اول از بَین رفت.“

۱۶ اوخته امُو که د بَله تَخت شِشتُد، گُفت: ”اینه، تمام چیزا ره از نَو جور مُونم.“ و بسم گُفت: ”نوشته کُو، چراکه امی توره ها قابلِ اعتِماد و حقيقة استه.“ ^{۱۷} بسم دَز مه گُفت: ”تكميل شد! ما «أَلْف و يَا» و «شروع و ختم» أَسْتُم. هر كسى که تُشنَه يَه، ما از چشمِه

آبِ حیات مُفت-و-رایگان دَز شی مِیدیم.^٧ و هر کسی که پیروز شُنَه، وارِثِ پَگِ امزی چِیزا
مُوشه و ما خُدای اُزو مُوبِشُم و او فرزند مه.^٨ لیکِن تَرسُوها، بے ایمانا، فاسِدا، آدمُکشا،
زنَاکارا، جادُوگرا، بُت پَرستا و تمامِ دروغگویا، جای شی دَ دریاچه اَسته که قد آتش و
گوگِرد سوخته رَبی یه که مرگِ دوّم اَسته.^٩

بعد اُزو یکی امزُو هفت ملایکه که هفت پیله پُر از بلای آخری داشت، آمده دَز مه گفت:^{١٠}
”بیه که ما بیری ره دَز تُونِشو بِدیم، خاتُونِ باره ره.“ اوخته او مره دَ روح دَیگ کوه
کله و قِيل بُرد و شارِ مُقدَّسِ اورُشَلیم ره دَز مه نِشو دَد که از آسمو از طرفِ خُدا تاه میمَد.^{١١}
او شار پُر از جلالِ خُدا بُود و روشنی شی رقمِ سنگِ قِيمَتی، یعنی مثلِ یشم بُود و
شفافِ مثلِ بِلور.^{١٢} او یگ دیوالِ کله و قِيل و دوازده درگه داشت که دَ درگه های شی
دوازده ملایکه بُود و دَ بِلِه درگه ها نام های دوازده طایفه بنی اسرائیل نقش شُدد:^{١٣} او
سِه درگه سُون شَرق داشت، سِه درگه سُون شمال، سِه درگه سُون جنوب و سِه درگه سُون
غرب.^{١٤} دیوالِ شار دوازده پای-سنگ داشت که دَ بِلِه ازوا نام های دوازده رسولِ باره نقش
شُدد.

امُو ملایکه که قد ازمه توره مُوگفت، یگ سِیخ اندازه گیری طلایی داشت تا شار و
درگه های شی و دیوالای شی ره اندازه بِگیره.^{١٥} شار دَ شکلِ چارکُنجی بُود و دِرازی شی
دَ اندازه بَر شی بُود. امو ملایکه شار ره قد امزُو سِیخ اندازه گِرفت که دِرازی اُزو دوازده

هزار تیر پورتَو بُود و درازی و بَر و بلندی شی یگ برابر بُود. ^{۱۷} او دیوال شی ره ام اندازه گِرفت که یگ صد و چِل و چار توغَی بُود، مُطابِقِ اندازه گِیری انسان که ملایکه ازو کار میگِرفت. ^{۱۸} دیوال شی از یشم جور شُدد و خود شار از طِلای خالِص جور شُدد که رقم شیشه پاک بُود. ^{۱۹} پای سنگ های دیوال شار قد هر رقم سنگ های قِیمتی مُزین شُدد: پای سنگ اول یشم بُود، دومی یاقوت نیلی، سِومی عقِيق آوى، چارمی زَمرَد، پنجمی عقِيق سُرخ، ششمی عقِيق چَگری، هفتُمی زَبرَجَدِ زَرد، هشتمی عقِيق آسمانی، نهمی یاقوتِ زَرد، دهُمی عقِيق سَوز، یازدهُمی فیروزه و دوازدهُمی لعل کبُود. ^{۲۰} امُو دوازده درگه، دوازده مُرواری بُود، هر درگه از یگ مُرواری جور شُدد. سَرکِ کِله شار از طِلای خالِص بُود، پاک رقم شیشه.

۲۲ ما هیچ خانه خُدا دَ امزُو شار نَدیدم، چراکه خُداوند-خُدای قادرِ مُطلق و باره، عِبادتگاه ازو آسته. ^{۲۳} و شار دَ آفتَو و ماهَتَو ضرُورَت نَدره که دَ بَلَه شی روشنیَي کُنه، چراکه جلالِ خُدا او ره روشو مُونه و باره چِراغِ ازو آسته. ^{۲۴} مِلت ها دَ روشنی ازو راه موره و پادشايون زمی شان-و-شَوکت خُوره دَ مَنِه ازو میره. ^{۲۵} درگه های شی دَ غَیتِ روز بسته نَمُوشَه، چراکه شاو دَ اونجی وجود نَمِیدَشته بشَه. ^{۲۶} مردم شان-و-شَوکت و ثُرَوتِ مِلت ها ره دَ مَنِه ازو میره. ^{۲۷} و هیچ چیز ناپاک دَ مَنِه ازو داخل نَمُوشَه و نَه ام کسی که کارای زِشت ره انجام بِدیه یا فریبکاری کُنه، بلکه تنها کسای که نام های ازوا دَ کِتابِ حیاتِ باره نوشتَه شُده، داخل نَمُوشَه.

۲۲ اوخته امُو ملایکه دریای آبِ حیات ره دَز مه نِشو دَد که رقمِ بِلور الَّی شَفاف بُود و از تَحْتِ خُدا و باره جاری مُوشُد^۱ و از مینکلِ سَرَکِ کِتَه شار تیر مُوشُد. دَه دُو بَغْلِ دریا درختِ حیات بُود که دوازده دفعه میوه میگِرفت یعنی دَه ماه میوه خُو ره مِیدَد و بَلَکَای امزو درخت بَلَدِه شفای مِلَّت ها بُود.^۲ دَأونجی دِیگَه هیچ لعنت وجود نَمِیدَشته بشه. تَحْتِ خُدا و باره دَمَنِه شار مُوبَشه و خِدمتگارای خُدا او ره عِبادت مُونه.^۳ اُونا چهره اُزو ره مینگره و نام شی دَپیشانه ازوا مُوبَشه.^۴ دَأونجی دِیگَه شاو نَمُوشَه و اُونا دَروشنی چراغ و روشنی آفتَو ضرورَت نَمِیدَشته بشه، چُون خُداوند-خُدا بَلَدِه ازوا روشنی مِیدَیه و اُونا تا آبدالاباد حُکمرانی مُونه.

و ملایکه دَز مه گفت: "امی توره ها قابلِ اعتِماد و حقِیقت آسته. خُداوند-خُدای آرواح پیغمبرا، ملایکه خُو ره رَیی کده تا چیزای ره که دَزُودی باید واقع شُنه دَ خِدمتگارای خُو نِشو بَدیه.^۵"

عیسیٰ مُوگیه: "اینه، ما دَزُودی مییم! نیک دَبَختِ کسی که توره های پیشگویی امزی کِتاب ره دِ دل خُو نِگاه کُنه."

ما یوَحَنَّا کسی اَسْتُم که امی چیزا ره شِنیدُم و دِیدُم. و غَيْتِیکه شِنیدُم و دِیدُم، دَ پایای

امزو ملایکه که امی چیزا ره دَز مه نِشو دَد، اُفتَدُم تا او ره سَجده کُنْم. ^٩ لیکن او دَز مه

گفت: "ای کار ره نَکُو. ما قد ازْتُو و قد بِرارون تُو پَيغمبرا و قد کسای که توره های

امزی کِتاب ره نِگاه مُونه، همِخدمت آستُم. تنها خُدا ره سَجده کُو!" ^{١٠} بعد ازْو دَز مه

گفت: "توره های پیشگویی امزی کِتاب ره مُهر-و-لاک نَکُو، چراکه وخت نزدیک آسته.

^{١١} کسی که بَدکار آسته، بیل که دَبَدکاری خُو اِدامه بِدیه و کسی که فاسِد آسته، بیل که

دَفساد خُو اِدامه بِدیه و کسی که عادِل آسته، بیل که دَعدالت خُو اِدامه بِدیه و کسی که

مُقدَّس آسته، بیل که خود ره مُقدَّس نِگاه کُنه." ^{١٢}

^{١٣} عیسی مُوگیه: "اینه، ما دَزُودی میبیم! آجر مه قد ازمه قتنی آسته تا دَه کس مُطابِق

اعمال شی بِدیم. ^{١٤} ما «آلف و یا» آستُم، «اول و آخر» و «شروع و خَتم». ^{١٥} نیک دَبَخت

کسای که چَپنای خُو ره مُوشویه تا دَدرختِ حیات حق دَشته بَشه و بِتنه از درگه دَشار

داخل شُنَه. ^{١٦} دَبرون شار سَگا، جادوگرا، زِناکارا، آدمگُشا، بُت پَرستا و تمام کسای آسته

که دروغ ره خوش دَره و دروغ مُوگیه. ^{١٧} ما عیسی، ملایکه خُو ره رَیی کَدُم تا دَز شُمو دَ

باره امزی چیزا دَجماعت های ایماندارا شاهِدی بِدیه. ما رِيشه و نسل داُود و سِتاره

روشونِ صُبح آستُم."

^{١٨} روح و بیری مُوگیه: "بیه."

و هر کسی که مِيشنَوه، بُگیه: "بیه."

و هر کسی که تُشنه يَه، بِيَه

و هر کسی که دِل شی آسته، از آبِ حیات مُفت-و-رايگان بِگِيره .

ما يوحنّا تمامِ کسای ره که توره های پیشگویی امزی کِتاب ره مِیشنَوه خبردار مُونم^{۱۸}:
اگه کُدم کس دَ امزیا کُدم چیزِ اضافه کُنه، خُدا بَلاهای ره که دَ امزی کِتاب نوشتَه شُدَه، دَ
بَلَه ازو اضافه مُونه.^{۱۹} و اگه کُدم کس از توره های پیشگویی امزی کِتاب کُدم چیز کم
کُنه، خُدا او ره از درختِ حیات و از شارِ مُقدَّس که دَ امزی کِتاب ذِکر شُدَه، بَه نصِيب
مُونه.

امُو که شاهِد امزی چیزا آسته، مُوگیه: ”آرَه، ما دُزُودی میئیم.“ آمين! بِيَه آی مَولا
عيسیٰ.

فَيَضِي مَولا عيسیٰ نصِيبِ پَگِ [مُقَدَّسِين] شُنَه. آمين.